

F. B. 88



IO. BAPTISTÆ GUGLIELMINI

DE DIURNO


TERRAE MOTU

EXPERIMENTIS

PHYSICO-MATHEMATICIS

CONFIRMATO

OPUSCULUM.



FA 7 B 88

BONONIAE

MDCCXCII.

EX TYPOGRAPHIA S. THOMÆ AQUINATIS
SUPERIORUM PERMISSU.

P R A E F A T I O .

1. Non inficiabor equidem nonnulla linguarum genera universi orbis nationibus ex optimarum artium studiis, scriptisque innotuisse: ii vero, iudicio meo, falluntur, qui, ut Gallos æmulentur, quæ ad istarum disciplinarum scientiam pertineant opera, vernaculis committunt linguis; perinde quasi suam per se quisque in totum mundum manifestam iri confidat, vel nihil saltem vereatur, ne res ipsæ late diffundi prohibeantur; quod sane utrumque in vitio ponendum est. Hæc ego animo perpendens latinis literis satis ubique notis opusculum mandavi; quamquam futurum plane cernerem, ut in grammaticorum reprehensiones de verborum delectu, atque elegantia incurserem. Verum si de errore, qui ad materiam spectet, accusatus fuero, me defendam, nullum porro unquam a grammaticis iudicium de forma accepturus.

2. Demonstratum iam fuerat, corpus per verticalem lineam sursum iactum, vel deorsum cadens, de normali via deflexurum fuisse, quotiescumque tellus circa suum axem volveretur.

Eo igitur de diurno terræ motu disputatio per venerat , ut experimento solvenda videretur : quamquam , quod multis placuit , & nonnulli etiam tentare ausi sunt , non erat istiusmodi lis periculosis , incertisque tormentis bellicis dirimenda ; quandoquidem ratione longe tutiori , felicique successu , de corporum ab altissimis turribus , tholisque lapsu experimentum capere potuissent .

3. Id ita esse ostendi , & palam feci opusculo , quod Romæ in lucem edidi labente anno millesimo septingentesimo octogesimo nono ; quod quidem experimento ipso munitum iam tum sic fuit desideratum , ut Roma ego sequenti anno in patriam reversus me totum ad id munus convertere non hæsitaverim .

4. Præstat autem , antequam longius abeam , opusculum illud ab obiectis vindicare . Etenim ab aliquibus in primis redargutus sum , quasi in id studuerim , ut ea pro novis habentur , quæ iamdiu in aperto erant : verum quibus freti argumentis id dictitaverint , latet prorsus ; neque enim quod proponebam tentamen novum non erat ; & si quid notum cadebat in opusculum , quod tamen novitatem posset præse ferre , illud unde collegisse omni cura adnotabam . Quæ vero publica monumenta opu-

scu.

sculum meum proprius tangunt , accusantque , tria sunt . Horum primum habetur in Folio Num . VII. Efemeridi letterarie di Roma . Anno 1790. , cuius folii exarator theoriæ meæ basim penitus evertit ; negat scilicet , ut verba in pauca conferam , circulorum concentricorum circa communem axem revolutorum velocitates differre ; quod sane accusationis genus protulisse sufficiet , ut tamquam falsum refellatur . Alterum videre licet in Volumine XLIII. Giornale de' Letterati d' Italia , in quo Iosephus Contarelli me reprehendit , qui argumentis ex telluris figura , atque ex corporum gravitate a polis ad æquatorem decrescente depromptis , prolatisque ad diurnum terræ motum exigendum , congruentiae tantummodo momentum tribuerim ; ea enim apud se , aiebat , vim obtainere demonstrationis : Recte quidem , neque enim id mihi cum ipso non convenit ; at quid tum postea ? non enim argumenta hæc sunt eiusmodi , quæ in systemate tychoniano cadere , si quidem velis , & explicari non possint . Alia deinde proponit non contemnenda sane , quæ tamen silentio præteribo , cum ex præsenti opusculo satis per se quisquæ intelligere valeat quid foret reponendum . Theodorus denique Bonati Mathematicus Ferrarensis documentum tertium in medium attulit ; sed de hoc

a 4

in-

infra ; nunc ad experimentum nostrum revertamur .

5. Turris , vulgo *degli Asinelli* dicta , media ferme in urbe nostra a sæculis nonnullis manet , quæ ad tercentorum pedum (de parisiensibus loquar) altitudinem pertingit : ad hanc in via ostium patet , perque cochlidem in centro scanditur ad pedes octo & viginti : hinc in quadram formam surrigitur vertice tenuis , quo scalæ ad latera in gyrum fixæ tutum præbent ascensum . Testudine in summitate occluditur , cui parvula turris incumbit , quæ pedibus quinque & triginta eminet , & tintinabulum capit ad civiles usus pulsandum : testudine itidem in ascensus parte tertia dividitur , quam supra planis tabularum duobus , & altero infra , profunditas tanta intercipientur , ne ascendentium oculos obruat , fallatque .

6. Testudine itaque hac perforata , & altera planorum tabula abducta , libera introrsum via ad bis centum & quadraginta pedes corporum lapsui aperiebatur ; quamobrem locum tentamini opportunum , atque accommodatum esse arbitratus sum ; nisi quod ob ostiola pene innumeræ , quæ fabricationis vestigia sunt , ventis omnibus pervia , rebar iam tum futurum fore , ut a labore meo , flante vento , distinceret .

7. Non me tamen ab opere terruit difficultas ; atque primum quidem ad Illustrissimos , atque Excelsos Munitionis Præfectos me contuli rogaturus , ut publica Turris libere mihi ad experiendum pateret ; qui pro summo , quo bonarum artium cultores prosequuntur amore , turrem mihi meo etiam commodo muniri ultro dederunt . Cæterarum tunc rerum gerendarum narrationem ad Illustrissimos , atque Excelsos Studiorum Præfectos deferendam curavi , illosque , ut sumptum rebus ipsis necessarium suggesterent impetraturus conveni ; nec me sefellit opinio , quippe non eram nescius in veteri studiorum nostrorum nomine tuendo non ultimam & ipsos civium laudem reposuisse . Omnis igitur operis in turre suscipiendi facta mihi potestate , constitutaque pecunia , rem inchoavi .

8. Cum ad cadentia corpora in imum fundum excipienda parum spatii , illudque in altera turris parte daretur ; hinc initium sumendum erat , ut quæ sursum via integro , expeditoque corporum lapsui recludenda foret dignosceremus . Hac perpendicularorum auxilio patefacta , sex circiter pedibus a testudine superiori novum tabularum planum substructum est , perque huius centrum nonnihil pertusum dimisimus perpendicularium , probaturi an stratum iter rectum esset , vi-

suri deinde quo loco consistendum , quove corpora ante lapsum essent suspendenda.

9. Duos postea inter fornices parallelos , quibus testudo ipsa fulcitur , trabs horizontaliter collocata est , iisque affixa : huic lapides imposuitus ad testudinis usque summitatem , cui suffigebantur , quos inter & trabem lamina cuprea horizontalis constringebatur , quae satis se promens rimam ferebat perexili verticali filo trai- ciendam : supra laminam uncus manebat : totumque opus calce conglutinatum fuit , atque duratum .

10. Globos interim plumbeos , quorum diameter par erat pedis pollici , bene tornatos , perpolitosque curaveram conficiendos : iis transversum vulnus infligebatur , quod , cute paululum elevata , filum in nodum desinens caperet : nodo subinde introducto , reconditoque , cuteque rursum depressa , vulnus sic sanabatur , ut filum recta e centro prodiisse videretur , ictusque vestigium nullum appareret in superficie . Filo hoc serico , vel lineo , aut metallico per laminæ rimam traecto , & huius extremitati innixo , uncus ad plures vices circumdatus globum ad alteram pollicis lineam infra laminam penden- tem firmiter sustinebat . Globo denique quiescen- te , filum supra laminam cremabamus flamma .

II.

11. Ut quid lamina hæc , inquiet aliquis ? lamina munera præstabat tria : filum prope glo- bum dividebat , ut protractæ , diuturnæque vi- brationes contraherentur , & brevi cessarent : verticalem corporibus lapsum præfiniebat : veta- bat postremo quominus aer a flamma excitatus suppositi globi quietem perturbaret .

12. Filo igitur combusto , fidebam fore ut globus una suæ gravitatis vi pressus motum ar- riperet verticalem : verticali itaque corporum lapsui ceræ planum in ima turre substraveram , in quod globos deinceps ruentes unam , eamdemque fossam percussuros esse sperabam , quam mox perpendiculo e suspensionis globorum pun- cto demisso perscrutari constitueram , visurus quantum globi de normali directione declinas- sent , ac utrum in orientem , anve alio iter in- flexissent . Verum duorum globorum , quos quar- ta horæ parte deieci , neuter inferioris testudi- nis foramen pervasit : atqui hoc in pedem qua- drum patebat , perque illius centrum transibat perpendiculum . Tentamen tribus iteravi diebus eventu prope eodem .

13. Quo vero maiori in discrimine ver- sabatur res mea , eo ego maiori spe erigebar , huius enim aberrationis globorum caussam oport- ebatur , neque tantam esse , cui occurrerepro hi- be .

berer, neque tam exiguum, quæ omnem inquietantem eluderet diligentiam. Turris porro ad hanc investigationes longe erat inopportuna; quare donum rem transtuli examinandam.

14. Variis hic modis, quos omnes recentere longum esset, globos suspendi, quos nudis oculis quietos conspicatus, vibrationibus et si minimis sollicitari adhuc observabam, dum eos per microscopium obtuebar. Post quinque & viginti circiter prima horæ scrupula vibrationes istæ sensim imminutæ subito evanescebant: tunc itaque filum suspensionis frangi mandabam; neque enim ego a microscopio oculos removebam, tanti mihi erat explorare quid contingere, dum igne, vel corrodentium acidorum vi filum de-truncabatur. Hinc etsi flamma libertatem globis citius maturaverit, quam novæ ipsorum vibrationes ob oculos venire quiverint (ut propterea deceptus sim, cum eos omnino quietos di-cessisse iudicaverim), non parum tamen contulit vidisse globos perfecte iam quietos iterum concitari, dum acidis filum discindebatur: quam-obrem combustionis methodo mihi tum probata, acidis posthac abstinendum esse decrevi, nec microscopio unquam parcendum.

15. In cupreo itaque bene lœvi cylindro, cuius diameter pedis pollicem paululum excedebat,

bat, canalem axi parallelum fodi ad partis pollicis quartæ profunditatem. Cylindrus hic horizontaliter situs, firmatusque ita, ut canalis rectus emineret, globorum filo in annulum duplicato circumdabatur. Sic globos appendebam: duo tum paralleli circuli cylindrum sibi proxime circumscripti statum locum filo suspensionis designabant ex intervallo: duorum postea perpendicularium hinc atque illinc a cylindri axe pendentium norma globorum centrum in verticali eiusdem axis plano sistebatur: oculis deinde microscopio armatis globos usque adeo speculabar, donec quievissent: filum tum denique supra canalem cremabam facillime, & nullo excitandi motum timore.

16. Expediebat tamen, & libuit, machinamentum hoc in INSTITUTI, ut aiunt, SCIENTIA-RUM AEDIBUS experiri, priusquam illud in turrem deportarem. Specula his ædibus ad astronomicas observationes superstat, quæ vertice tenus scanditur per cocleam in centro normaliter apertam. Coclea porro ad nonaginta pedum altitudinem pertingit, & ab omni externi aeris perturbatione protegitur; ut mihi propterea die quavis, neque irrita opera, in rem meam incumbere concederetur.

17. Anno igitur millesimo septingentesimo

nonagesimo , pridie idus Septembris , idibus ipsius , & postridie , adiuvante Aloysio Zanotti , iuvene avos suos æmulante , experimentis operam dedi , tantaque nos gessimus diligentia , ut duabus cuiusque diei horis vix de duobus globis periculum factum sit . Prima die Petronius Matteucci , vir summæ authoritatis , summaque doctrinæ Astronomus opportune adfuit cum secundus globus delaberetur , quem ipse primi globi fossam ad unguem attigisse testabitur . Postridie fossarum neutra hesternæ fossæ concentrica fuit ; harum vero cum illa excentricitates , meridionalis altera . altera borealis , ne ad dimidiū quidem pollicis lineam pertinebant . Postrema tandem die globus primus in primæ diei fossam decidit , secundus paululum in austrum prolapsus est . Tunc coram Petronio Matteucci , & huic in astronomica laude adjuncto Francisco Sacchetti viro doctissimo , perpendicularum deductum est , a quo fossarum centra duabus circiter lineis ad orientem spectare conspeximus .

18. Cum filum , quo globi suspendebantur , verticale mansisset post casum fere nunquam , cadentes globos rotari intelleximus : cum autem rotationem hanc ab excentrica ipsorum massa originem dicere suspicaremur , consequens videbatur , ut ab hac eadem caussa proficiuceretur

fovealum excentricitas . Duos propterea globos sumpsi exteriori superficie integros , perfectosque , quorum alter massam de industria sensibiliter excentricam obtinebat ; illosque sequenti periculo subieci . Et primum quidem annulum iis ex filo inserui tantulum (*Parag. 10.*), ut per hunc vix acus ope filum traduceretur , quo annulus conficiebatur cylindro circumvolvendus ; sicque consequencebar , ut filo huic pro tentamine quoque perusto novum sufficerem , quin globi vulnus renovarem , atque mutarem . Decimo vero kalendas Octobris , quinque horis a meridie usque ad secundam pomeridianam , globos bis ad duas mundi horas ex diametro oppositas eandem faciem obvertentes deinceps suspendi , & octies experimentum institui , repetique . Exitus porro hic fuit : tribus interdum lineis globi utriusque centrum a perpendiculari directione recessit ; neuter vero globorum deviavit plus altero , nulloque aberrationes ordine sibi successerunt : quapropter etsi globos in cadendo detrimentum passos esse intellexerim , caussa tamen saltem non omnis massarum excentricitati inhærere visa est ; sed neque culpam omnem in machinamentum traiicere licebat .

19. Quæ vero dubitationibus meis modum poneret , remque in apertum proferret , publicatur .

14

turris præsto esse videbatur; de qua scilicet orientalem corporum aberrationem expectabam tantam, quantam ne contrarius quidem eccentricitatis massarum effectus elisisset. Turrem itaque alacris iterum adivi: sed quæ præter opinionem meam obvenerint fideliter prosequamur.

20. Cum diurno civitatis strepitu, & curruum concursu, turris interdiu perpetuo contremat, nocturnarum horarum silentio negotium nostrum committere, & commendare, remque in plurimam, & tardam quandoque noctem traducere coacti sumus. Interea autem dum nocturnis ventorum præliis ab opere deterrebar, cylindrum ex chalybe, ut levior esset, mihi comparavi, cuius diameter duas pollicis lineas superabat, illumque canale, suisque circulis instructum ad cuprei cylindri similitudinem in turre constitui, ut avulsæ laminæ munere fungetur. Atque ut primum pax ventis indicta est, & moram rumpere fas fuit, turrem ego, & Senator Alamanus Isolani, vir de patria nostra, & que ac de studiis optime meritus, conscedimus, manentibus ad imum Alfonso Bonfoli Regnantis Pii Papæ Sexti Prælato domestico, viro & literarum, & physicarum rerum scientia ornatissimo; atque Petronio Colliva, iuvene in mathematicis disciplinis spectatissimo, quorum mu-

nus

15

esset, a præfixis in ceræ plano limitibus fossarum distantias emetiri, foveamque pro tentamine unoquoque, adiecta cera, obturatam plano æquare.

21. Prima hæc nox erat, qua sequens annus initium duxerat, & publica spectacula populo redire iubebantur, quibus civitas accurrens turrem nostram frequens præterebat. Quapropter cum primus globus a vibrationibus abstinuisse, iamque prope esset ut filum combureremus, ecce currus in via prætergressus turrem succus sit, & globus vibrationibus commotus est inermi oculo conspicendi; quod ipsum & hac nocte, & aliis in posterum sæpe sæpius accidit, ut multum propterea temporis in experiendo triverimus. Attamen ab hora tertia ad quintam, curruum frequentia imminuta, tres globos periculo dedimus, quos singulos ad planum a nostro secundum pleno ictu offendisse animadvertimus. Descendimus ergo, & quem liberum per huiusmodi planum corporibus lapsum aperuera- mus, illum tabulis obstructum comperuimus; quam observationem, dum ascendebamus, prætermisisse penituit, sed sero; hac enim de causa, & quia validus de oriente ventus eruperat, illa nobis nox incassum consumpta est.

22. Ab hora noctis tertia usque ad sextam,

tum

tum nonis Ianuarii , tum tertio idus eiusdem , duos globos detrusimus . Primus utriusque noctis silente vento dimissus est , & eamdem prope fossam attigit : qui autem secundo deiecti sunt foveis valde dissitis occurserunt , quod nobis utique advenisse visum est pro ut res ipsa ferebat , postulabatque ; statis enim noctis horis cælum nubibus repente obducebatur , quibus aer concitatus impeditiebat quominus postremi suspensi globi perfectam quietem carperent ante lapsum : quin imo tertium globum , quem nocte altera , invitis ventis , appenderamus , horam post integrum perpetuo , valdeque irquietum abstraximus , ne tempus ulterius , & operam perderemus .

23. Idibus denique Ianuarii laborem resumpsi ingratissimum ; cuius quidem noctis recordatio eo vel acerbissima subit , quia ultima fuit , qua suam præstitit operam charissimus mihi a teneris annis , atque coniunctissimus Petronius Colliva , iuvenis ob probatos mores , atque doctrinam omnibus acceptissimus , de cuius morte urbs tota conquesta est , & dolet usque . Evenit autem hac nocte , ut dum Senator Alamanus Isolani filo quieti globi ignem admoveret , globus mihi ipsum per microscopium insipienti subito contremere visus sit ; quare ne filum cremaretur

si-

signum dedi , sed non tam cito , ut huius pars non sit usta ; quapropter globus valde concitus fuit , non tamen distractus . Hic vero denuo quietus , duoque alii deinceps experimentum subierunt ; qui fossas ne sese quidem tangentes percusserunt , cœlo nobis cæteroquin favente . Quidni igitur , inquietam , tantum aberrationum discrimen combustionis vitio tribuero ? At enim experimenta in Instituti Ædibus bene verterant ? cylindrus itaque accusandus videbatur parvus plus æquo : verum quid cylindro rei erat cum vitiosa fili combustionē ? concedebam equidem filium tutius , & citius in cylindro maiori aduri posse ; at numne accedente flamma filum tum etiam ex parte non cremabatur , temporeculum post aliquod quantumvis minimum , solummodo consumendum ? hoc igitur gravitantis globi vi distentum interim contremiscens globum ipsum concitare debebat ; de quo sane instituta quoque experimenta (Paragr . 18.) suspicionem invexerant ; quamobrem quæ adhuc bene cesserant experimenta , pro nihilo posthac habui , despexique .

24. Tum vero prope est factum , ut opus dereliquerim : nisi quod certior per literas factus sum celeberrimos Viros Romæ , Taurini , & alibi , suam tentaminibus iisdem operam sedulo,

b

&

& obnixe impendere : quamobrem abiectum annum recepi , novamque etiam deliciendorum corporum methodum meditatus sum , & exequatus ; quam ad ultimum pro voto successam in articulo tertio præsentis opusculi plane exponam .

25. Mihi interim hanc mente volventi , atque excogitanti , obnuntiatum est manuscriptam demonstrationem per mathematicorum manus iamdiu deferri , qua Theodorus Bonati probabat meridionalem aberrationem , quam opusculum meum orientali minorem pollicebatur , futuram fore orientali ipsa sexies maiorem . Ne id igitur me celaret , Authorem per epistolam rogavi , qui & desiderium meum comiter explevit , & inventum suum , propediem illud publicaturus , tantisper distulit , dum quid mihi sua de re videretur acciperet : spondebat imo , recipiebatque se opusculi editione supersessurum , si id per me ita sibi persuasum habuisset ; cæterum Iosephi Canarelli Romani Astronomi diligentissimi experimenta addebat , quorum eventus opinionem suam mirum in modum fulciebat , rōborabatque .

26. Primum ego experimentis Iosephi Canarelli illud obiiciebam , quod microscopii præsidio fuerint destituta . Miratus porro valde sum

Theo-

Theodori Bonati demonstrationem multorum mathematicorum sententia fuisse suffultam ; non quin calculi recti fuerint , sed quia non eo ducebant , quo ipse contendebat . Me primus monuit Senator Alamanus Isolani , responsionem ad Theodorum Bonati passim reperiri , & manifestam fieri apud Authores , & illos maxime , qui de telluris theoria tradiderunt . Verum , quod mihi in more positum est , longum , & laboriosum problema denuo per memet solvere iam aggressus fueram ; de quo tamen ne cum iis quidem communicabam , quibus res meæ antehac ultro patuerant , veritus ne si quid novi evolvendum delitesceret , id mihi , ut quandoque contigit , præripereret : quamquam solutionibus ad ultimum collatis , nihil profecisse intellexi ; nihil enim novi detegere datum est , præter cuiusdam generis serierum in summam congerendarum methodum , quæ adhuc in occulto iacuerat : sed hæc alterius temporis res sit . Theodoro interim Bonati suadebam , eumque hortabar , ut tamdiu super opusculi publicatione cunctaretur , donec per experimenta compertum haberemus , utri nostrum foret a sententia sua recedendum : neque tamen de calculis quoque ultro citroque non conferebamus , sed de iis sermonem iniveram , inque iis me detinebam , qui omnino fere extra rem erant:

b 2

tant : quare verba sibi ipse a me dari suspicatus , vel inani epistolico commercio pertensus , hoc interrupit , & opusculum typis commisit , de quo in secundo articulo sermonem instituam .

27. Theodori Bonati opusculum Bononiæ apparuit postridie quam novis tentaminibus in aper-
to posuisse videbar , ipsius theoriam paralogismo laborare : problema quoque , de quo supra men-
tionem habui , ad felicem exitum pervenerat .
Cum itaque eos , qui Thedoro Bonati suffraga-
bantur , urgerem , posceremque qui fieret ut ex-
perimentorum , calculorumque par exitus non es-
set , fuit tum denique qui huiusmodi discriminis
indictum dederit : quare illico ego demonstratio-
nem (*Art. II. Paragr. 21.*) , qnæ prædicti pro-
blematis corollarium est , itemque aliorum , quæ
in Authoribus observare licet , notam feci . Hæc
porro ut primum prodiit de paralogismo ipsa ac-
cusata est , utpote quæ astronomicarum observa-
tionum fundamentum destrueret , ac ea præser-
tim in dubium revocaret , quæ de locorum , a-
storumque latitudinibus rata iam sunt , atque
sancita : inanis sane timor , qui brevi evanuit ;
& eos tum postea gavisus sum laborum meorum
prosequutores habuisse , atque vestigiis meis in-
sistentes , quos adversarios offendisse piguisset ,
ma-

magistros vero consuluisse semper gloriabor .

28. Nonnullæ subinde quæstiones ortæ sunt ,
circa quas satis habeo modeste quid sentiam a-
peruisse . De harum tantum altera verbum mihi
faciendum arbitror (*in Art. I.*) ; quippe hæc ad
opusculi materiam proprius pertinere videtur . O-
pusculum itaque hoc in tres articulos partitus
sum ; in quorum primo potissima attingo , quæ
anno millesimo septingentesimo octogesimo no-
no in publicum edidi , eaque clarius aperio : al-
ter ea complectitur , quæ tum claritatis gratia
erant addenda , quibus ea confero , quæ Theo-
dorus Bonati opposuit : in tertium denique ex-
perimenta conieci , quibus theoriam meam ro-
borarem , ratam facerem , atque confirmarem .

29. In longis , & implicatis calculorum semi-
tis declinandis totus fui , & tum maxime , cum
operæ prætium non haberetur . Mihi nihilominus
in eorum animadversiones sentio fore inciden-
dum , qui omnis omnino mathematicæ doctrinæ
expertos , mathematicos incerta plerumque mo-
liri , & inutilia navare autumant : hi scilicet ,
quod ipsos decet , iudicium ferunt , quibus pro-
pterea nulla erit a me responsio . Illud porro sem-
per ægre feram , mathematicos , dum etiam præ-
ter communem fere ævi nostri scribendi ratio-
nem , civium animos ad rectas , innocentesque

meditationes allicitunt, hosque novis cognitionibus imbuunt, excoluntque, nihil ne in hoc quidem præstare videri, quod cives ab otio vitiorum turpissimo, atque reipublicæ infestissimo, revocare, & removere conentur. Et hæc hactenus.



DE DIURNO TERRÆ MOTU.

ARTICULUS I.

*De iis, quæ in publicum edidi Anno 1789.,
& nonnullarum obiectionum Solutio.*

I. Sit T terræ centrum, P mundi polus, TQ Fig. I. radius æquatoris, TP axis diurni motus, & QM meridianus, quem licuit circularem posuisse. Accipiatur $TQ = TM = TP = r$, & arcus terrestris latitudinis $QM = q$; porrigitur radius TM in m , dicaturque $Mm = a$, ut sit $Tm = r + a$; ducantur denique rectæ MN , $m n$, normales ad TP , ut fiat $MN = \cos. q$, atque $TM : MN :: Tm : mn$, idest $r : \cos. q :: r + a : mn$, proindeque $mn = \frac{r+a}{r} \cos. q$. Vocetur postremo u velocitas, qua punctum M in terræ superficie positum absolvit diurnum motum circa axem mundi TP , si sequentem rationem institueris $MN : u :: mn : \frac{u \cdot mn}{MN} = \frac{r+a}{r} u$, erit hæc diurna velocitas puncti m .

2. Ad dicendarum rerum facilitatem conduxit tellurem finxisse sphæricam, & in orbe suo ab anno motu consistentem; id enim in subducendorum calculorum errorem vertebat nullum. Labatur itaque corpus de sublimi punto m ; ipsum profecto diurna sua tangentiali velocitate horizontaliter propulsum, centralique puncti T attractione insimul correptum, ellipsim respectu telluris in absoluto spatio describet, cuius curvæ focus alter dabitur in T , & alter apsis in m . Arcus tamen in tentaminibus nostris conficiendus poterit indiscriminatim parabolicus existimari; maxime cum parabolicum lapsum iuvet aer, cuius reactione corpus in verticali motu retardatum in curvam sese coniicit ellipsi deinceps ampliorem, parabolæ propterea satius conferendam. Ne igitur laborem sererem, longis ellipticis calculis reiectis, breviissimis institi parabolicis.

3. Animo nunc concipiamus per punctum m , & centrum T , normaliter ad $TQmP$ transire planum, quod per (Fig. II.) repræsentab.
Fig. II. bo, in qua est T centrum terræ, DMZ circulus terrestris maximus parallelum MN (Fig. I) tangens in puncto M , & Mm perpendicularum, quod de puncto m suspensum ad centrum T secundum dirigere supposui; etsi enim in meridiem pau-

lu.

lulum derivetur (Artic. II. Paragr. 20.), id tamen calculis pro orientali aberratione putandis nocebat nihil. Punctum denique D ad orientem, Z ad occidentem respiciunt. In plano sane $TDmZ$ fiet compositio virium corpus sibi in m liberum moventium; hocque diurnæ velocitati puncti m , nec non suæ gravitatis vi commissum detrudetur per parabolam mCD , cuius vertex cadet in m , & axis erit mM ; quamobrem per parabolici iactus leges corpus in labendo recedet in absoluto spatio a præfixo axe mM , uti si sola diurna horizontali, & æquabili velocitate puncti m sollicitaretur. Et quoniam diurnum arcum æquabiliter interim percurrendum a puncto M confundere licet sua cum tangente in ipso puncto M ; idcirco punctum quoque M moveri videbitur per MC in eodem plano $TDmZ$; enimvero tangens in M communis est circulo maximo DMZ cum parallello MN (Fig. I.). Cum itaque tum corpus labens, tum punctum M parallele, & æquabiliter a prima perpendiculari positione mM in orientem ferri censeantur, illud velocitate $\frac{r+a}{r}u$ (Parag. 1.), hoc velocitate $u < \frac{r+a}{r}u$; ita tamen ut corpus eodem tempore deorsum raptum occurrat denique

arcui MD , sive tangentи MC ab M describendae; consequens post lapsum fit, ut corpus prætergressum sit punctum M eodem prope modo ac si, communī punctorum m, M , diurna velocitate omissa, corpus iam a principio lapsus recesserit a perpendiculari MM diurno motu insimul translato velocitate horizontaliter æquabili $\frac{r+a}{r} u - u = \frac{a \cdot u}{r}$ orientem versus. Probato itaque lapsus tempore, quod dicam t , tum postea de punto m , unde corpus discessit, deducto perpendiculari, cuius auxilio diligenter præfigatur meridianus $QM P$ (Fig. I.); reliquum erit, ut orientalem corporis aberrationem a meridiano hoc, sive a perpendiculari ipso MM perscruteris, visurus an facta revera sit $\frac{a \cdot u}{r} t$, tanta scilicet, quantam edere potuerit tempus ductum in velocitatem $\frac{a \cdot u}{r}$; quæ porro aberrationis formula valet tantum in fine lapsus (Parag. 7.). Hęc de orientali corporum aberratione dixeram: verbum addidi de meridionali; sed de hac fusius in sequentibus articulis.

4. Ne autem difficultatibus locum ullum videar reliquise, iuvabit hic obiectionem a magni nominis Geometra factam refellere. Sit, in-

quie-

quiebat ipse, TM terrestris radii directio, in Fig. III. qua producta iacet perpendiculari mM ; sit MD tangens tellurem in M , & $mC cD$ parabola, per quam corpus in spatio absoluto, & vacuo cadens derivatur ad horizontem MD in D ; sint CB, cF , duorum terrestrium radiorum protensorum partes radio mT parallelæ (quod de radiis ad totum arcum MD (Fig. II.) spectantibus fingere licet), sibique sic proximæ, ut corpus velocitate in labendo acquisita in curvæ punto C , temporis momento transire valeat de C in a per rectam $AC a$ tangentem ad curvam in ipso punto C ; appelletur denique CI constans, & momentaneus effectus terrestris attractionis, qua corpora in superficie telluris sphærica ad centrum T iugiter exiguntur. Hisce præmissis manifesto apparet, corpus in C viribus Ca, CI , actum descripturum fore diagonalem parallelogrammi $Clca$, laterculum videlicet curvæ Cc . Accedat modo aer; corpori progredienti per Ca atmosphæra impedimento erit, ne supradicto horæ momento compleat totum cursum Ca . Si itaque mente fingas, de quo nemo sane te arguet, corpus sentire in C totam aeris difficultatem sibi per Ca perferendam, illud sequetur, ut corpus in C sola velocitate $Co < Ca$ pollere intelligatur, velocitate interim

tim $C I$ integra manente: quare facta virium $C o$, $C I$, compositione, illud ex mechanice legibus sponte fluit, ut corpus atmosphærām per vasurum transferatur de $C c$ in $C u$ diagonalem parallelogrammi $I C o u$, quam in figura notatam imaginaberis. Demonstratio hæc, concludebat prælaudatus Geometra, ab initio ad motus finem repetita, eo nos tuto ducet, ut plane fateamur corpora naturali nisu per aerem labentia curvam descriptura fore contractiorem illa, per quam in spatio vacuo delabentur. Atqui ego contrarium dixeram (*Parag. i.*): huic porro difficultati sic occurri.

5. Resolvatur velocitas tangentialis $C a$ in duas sibi normales $C B$, $C F$, quarum hæc horizontalis sit, verticalis altera: velocitati horizontali $C F$ nihil sane officit aer, huius enim diurna velocitas communis procul dubio censeri potest cum corpore cadente: corpus vero aerem verticaliter permeans iacturam faciet in velocitate $C B$, quæ idcirco residua fiet certa quædam $C E$; vel, quod postremo in idem exit, attractionis vis prohibebitur quominus effectum suum $C I$ integrum operetur, aut consequatur, velocitatibus $C B$, $C F$, intactis manentibus. Viribus itaque $C F$, $C E$ coeuntibus, corpus in C viam $C a$ aditum confestim tra-

du-

duceretur de $C a$ in $C i$ diagonalem rectanguli $F C E i$; sed velocitate $C I$ cum $C i$ concorrente, propelletur per arcum curvæ $C e$ diagonalem videlicet parallelogrammi $i C I e$, quam concipies iam exaratam. Ex ipsa porro figuræ inspectione patet plus satis, corpus per atmosphærām ruens in curvam deinceps latiorem quam in spatio vacuo iter suum fore inflexurum. Hac via, ut & ea, quam in sequenti paragrapho insistam, notas quoque difficultates effugi, quibus obnoxia est prædicti Geometræ virium ob fluidi resistantiam compositio. Hisce autem prælaudatus vir omnino acquievit.

6. Non id vero sic omnibus persuasum fuit; alii enim alia reposuerunt: hi autem in duas partes divisi sunt; fuerunt enim qui responsioni meæ vitio dederint virium, quam facio, decompositionem: reliqui vero, ut me ore meo iudicarent, ea protulerunt, quæ opusculo meo minus caute consignaveram. Obiectio prima huc omnis contrahitur, ut resolutarum virium horizontalis $C F$ nusquam diurno atmosphæræ motui æqualis sit præter locum m . Ut difficultas hæc primum diluatur, libenter dabo velocitatum horizontalium labentis corporis, atque rotantis aeris differentiam calculis subducendam fuisse. Esto itaque $C a$ velocitas quam decomposui in Fig. IV.

duas

duas CB verticalem, atque CF horizontalem : excipiatur portiuncula XF , sitque hæc horizon- talium prædictarum velocitatum discrimen in fine lapsus: demus postremo aerem iam ab initio motus horizontali velocitati CF obniti ve- locitate XF , quamquam tum quantitas XF sit omnino nulla. Velocitas certe XF erit vel ma- xima præ CF ; quare ducta ratione hac CF :

$$XF :: CB : BY = \frac{FX \cdot CB}{CF}, \text{ erit quoque } BY$$

minima præ CB . Hic insuper notare iuvabit ve- locitatem CB statim ab initio motus maiorem fieri velocitate CI ; hæc enim momentaneus at- tractionis effectus est, illa vero eorumdem ef- fectuum summa; quamobrem etsi velocitas CB quantitate BY minuatur, hæc tamen tantula est, ut nusquam in iactu non sit $CY > CI$. Age modo rectas $X\alpha, Y\alpha$, parallelas lineis CB , CF ; si horizontalem aeris reactionem XF cor- pori sic communicari intelligas, ut atmosphæra ipsa in occidentem retrogrediatur velocitate XF ; singasque tum postea aerem insimul sursum a- scendere velocitate BY ; colliges plane atmo- sphærām velocitatem α ex BY , atque XF com- posita motum corporis per $C\alpha$ ita afficere, ut quo tempusculo venisset in α , pervenerit dum- taxat in σ (quotiescumque porro labentis cor-

po-

poris atque aeris densitas una sit, quod nihil ad rem hanc). Sed quo tempusculo corpus nor- maliter findit aerem velocitate CB , aer ipse sursum attolli censemur velocitate ipsa BC , quam diximus vel maximam præ BY ; ergo intacta manente velocitate CX , velocitas residua CY adhuc maxima præ BY detrimentum patietur EY satis magnum præ BY , quod tamen mox in re erit posuisse saltem $EY > BY$. Ducta itaque recta Ei parallela linea CF , actaque diagonali Ci in rectangulo $XCEi$, si corpo- ri in C velocitate Co viam Co adituro, eam aeris reactionem EY communicari imagineris, quam velocitate CY per verticale spatium CY pertulisset, ipsum sane per Ci sese coniiciet; nisi quod velocitatibus Ci, CI , insimul con- currentibus, protrudetur per Ce diagonalem pa- rallelogrammi $iCie$, quam descriptam concipies. Ut autem demonstrem laterculum curvæ Ce ia- cere extra curvam Ce in spatio vacuo a la- bente corpore designandam, illudque proinde semper stare, quod, habita etiam ratione ad horizontalem atmosphæræ resistantiam, quæ ex velocitatum corporis & aeris differentia habe- tur, corpus nihilominus curvam descripturum sit ampliorem in atmosphera, quam in spatio va- cuo; satis erit si ostendero futurum semper fo- re

$re u e > u x$, quod statim præsto. Nam ex similibus triangulis xcu , CtI , habemus $cu = ao : e I = Ca : : ux : CI$, unde $ux = \frac{ao \cdot CI}{Ca}$; ex similibus item ACB , oCY , obtinemus $ao : Ca : : BT : BC$; unde $\frac{ao}{Ca} = \frac{BT}{BC}$, atque $ux = \frac{BT \cdot CI}{BC}$. Est deinde $ie = CI = io + oe = ET + oe$; est rursus $ie = CI = ao = ue + oe$, unde $io = ET = ue$, ex quibus in unum collatis infero $io = ET = ue > ux = \frac{BT \cdot CI}{BC}$; idest $ET \cdot CB > BT \cdot CI$, quod ex dictis sponte, & manifesto patet, vidimus enim tum $ET > BT$, tum $CB > CY > CI$. Ab hac igitur obiectione expediti ad alteram sermonem convertamus.

7. Cum in opusculo meo condendo id operam dederim ut facilis fierem, & ad omnium captum accommodatus, ea omnia declinavi, ad quæ per planas calculorem vias pervenire vetaverem. Supposui itaque corpus iam ab initio motus digredi a perpendiculari mM horizontali re lativa velocitate $\frac{a \cdot u}{r}$ (*Parag. 3.*) parabolam $mn\delta$ descripturum, cuius vertex fuerit m , & mM

Fig. III.

mM axis; tellure interim atque atmosphæra in quiete manentibus. Si id igitur, inquietabat non nulli, ita sit, parabola $mn\delta$ motu ad perpendicularum relativo absolvenda contrahetur quotiescumque aerem adesse ponamus; quod ex obiectione supra allata (*Parag. 4.*) clare patet. At neutquam sane res ita se habet, neque enim corpus iam a principio motus recedit a perpendiculari mM relativa horizontali velocitate $\frac{a \cdot u}{r}$; quamquam problematis solutio eodem postremo recidat. Accipiatur punctum quodvis G in perpendiculari mM , nuncupatisque, ut supra, $mM = a$, & radio telluris $TG = r$, appellataque linea $mG = x$, unde $TG = r + a - x$; cum dixerimus u diurnam velocitatem puncti M , si feceris $TM : TG :: u : \frac{u \cdot TG}{TM} = \frac{u(r+a-x)}{r}$, erit hæc diurna velocitas puncti G ; atque facta $x = 0$, erit $\frac{u(r+a)}{r}$ diurna velocitas puncti m . Communem modo diurnum motum sic deficere, & auferri sumas oportet, ut, pro variabili quovis puncto G , corpus cadens recedat a perpendiculari mM horizontali relativa velocitate $\frac{u(r+a) - u(r+a-x)}{r} = \frac{u \cdot x}{r}$, quæ puncto.

ctorum ipsorum m , G , diurnarum velocitatum differentia est. Fac nunc corpus per spatium vacuum cadens derivatum fuisse in b , ducque lineolam horizontalem Gb ; ex legibus galileanis tempus lapsus per $m b$, quod idem est atque per $m G$, evadet $t\sqrt{x}$, ubi t est quantitas experimentis detecta. Erit ergo $Gb = \frac{u \cdot x}{r} t\sqrt{x}$, idest horizontalis aberratio Gb æqualis fiet producto ex horizontali velocitate $\frac{u \cdot x}{r}$, & tempore $t\sqrt{x}$ (*Parag. 3.*). Hinc si posueris $Gb = y$, obtinebis curvæ $m b d$ in spacio vacuo describendæ æquationem $Gb = y = \frac{u \cdot t}{r} x^{\frac{3}{2}}$, quæ ad tertii ordinis lineam est de parabolarum familia.

8. Tria autem hæc animadversione digna sunt. Curva $m b d$ convexam sese offert perpendiculari $m M$, non vero concavam uti $m n d$; id patet ex ordinatæ y exponente $\frac{3}{2}$ exponente abscissæ x . Curvæ $m n d$, $m b d$ sese in fine motus secant in d , si ambæ vel in vacuo, vel in spacio aere pleno descriptæ fuerint: appellata enim $x = m M = a$, tempus lapsus per $m M$

sit

fit $t\sqrt{a}$, habeturque $y = M d = \frac{u \cdot t}{r} a^{\frac{3}{2}} = \frac{u \cdot a}{r} t\sqrt{a}$; quod idem invenimus (*Parag. 3.*); nisi quod tempus lapsus per $m M$ notavimus tum simpliciter per $t = t\sqrt{a}$ pro præsenti supputatione. Corpus denique constanti attractio- nis vi normaliter ad $M D$ deorsum pressum curvam $m b d$ percurrere non valebit, nisi hori- zontali insimul relativa vi constanter accele- rata urgeri intelligatur; cuiusmodi utique est velocitatum diurnarum punctorum m , G , diffe- rentia.

9. Resecetur nunc laterculum curvæ $b f$ tem- pusculo minimo absolvendū, ponamusque cor- pus per quiescentem atmosphærā labi, ita ut prædicto tempusculo complere valeat cursum dumtaxat bb . Iterato in b constantis attractio- nis impulsu, si impulsus horizontalis relativus re- peteretur idem atque in b , corpus moveri per- geret per $b f$: vidimus vero (*Parag. 8.*) ho- rizontalem impulsū hunc constanter augeri; ergo de via $b f$ transferetur per $b g$, iactusque deinceps, sensimque latior fiet si per atmosphæ- ram labatur corpus, quam si in spacio vacuo; quod mihi fuerat demonstrandum.

10. Hæc porro leviter transisse sufficiat,

c 2

ut

ut ne huiusmodi dubitationes aliorum animos ob-
ruant, & in errorem trahant: et quamvis hinc
ad altiores investigationes mihi aperiatur via,
has tamen omittam, cum non sit quamobrem
de his nunc magnopere laboremus.



ARTICULUS II.

*De iis, quæ in opusculo planius exponenda erant;
ubi ad Theodori Bonati opusculum responsio fit,
omnisque Theoria clariori methodo
completur.*

I. Tellurem, hoc quoque in Articulo, ab anno motu vacantem accipimus, atque sphæri-
cam; quod si de sphæroidea quandoque sermo
occurrat, id expresse adnotabimus. Cum itaque
corpus ob diurnum terræ motum sese in para-
bolicam semitam mCD (*Fig. II.*) in labendo
coniiciat, qui illud ego per curvam mbd (*Fig.*
III.) præter perpendicularm mM prosequutus fue-
ram, duo potissimum prætermisso visus sum.
Atque primum quidem ducta $C M$ tangente in *Fig. II.*
 M ad circulum DMZ , atque DE sinu anguli
 $M TD$, profunditas, ad quam corpus post
lapsum pertigerit, est $mE < m M$, qua ego mM
in calculis usus sum. Antecedentis itaque arti-
culi denominationibus retentis $T M = r$, $m M = a$,
& cosinus latitudinis QM (*Fig. I.*), idest MN
 $= \cos q$; Theodorus Bonati sumit sibi K pro tem-
pore lapsus per mCD in spatio vacuo, g diem
integrum nuncupat, atque $d:p$ proportionem
dia-

diametri circuli ad suam peripheriam. Indagatum postea velocitatem diurnam puncti m , concedit hanc cum terrestris attractionis vi componi in immobili plano $T D m Z$, in quo datur centrum attractionis T , suspensionisque labentis corporis punctum m ; neque negat attractionis directionem pro toto arcu $M D$ censeri posse usque parallelam radio $T M$, ut iactus propterea $m C D$ parabolicus sit. Calculis deinde submittit arcus $m C D$ amplitudinem $D E = \sin.$

$M T D$, acceptoque $\cos. q = \frac{3r}{4}$, qua de latitudine in opusculo meo agebatur, per notas parabolici iactus regulas elicit $E D = \sin. M T D$

$$= 3 \kappa p (r+a) \sqrt{\left(\frac{2ar}{8arg^2d^2 - (3\kappa p(r+a))^2}\right)},$$

indeque eiusdem anguli $M T D$ sinum versum, idest $M E = \sin. vers. M T D =$

$$\frac{a(3\kappa p(r+a))^2}{8arg^2d^2 - (3\kappa p(r+a))^2}. \text{ Vocab postre-}$$

mo racium telluris $r = 19613790$ pedibus pariensibus (qui medius est terræ nostræ radius), $a = \text{pedib. } 340$, $d:p::113:355$, $g = 24$ bo-
ris, $K = 5'' \frac{1}{4}$, quo tempore corpus per atmo-
sphærām decidit ab altitudine a ; hæcque singu-
la recipit, atque pro ratis habet, ut in opuscu-

lo meo reperiuntur; atque hinc eruit $D E = pe-$
 $dib. 5623, o 14, & M E = ped. o, 806004$. Sup-
putat tum denique diurnum arcum a punto M in
parallelo $M N$ (Fig. I.) conficiendum tempo-
re $K = 5'' \frac{1}{4}$, quem in circuli maximi arcum tra-
ducit, cuius sinum reperit æqualem $pedib. 5622,$
 9209 . Sinum postremo hunc demit a sinu $D E$,
ut residuam habeat orientalem aberrationem æ-
qualem *pedis pollicibus* 1, cum *pollicis lineis* 2,
47; quam ego rotundiori numero expresseram
per *pollices* $\frac{6}{3} = \text{pol. } 1$, cum *lin.* 2, 40. Id no-
tavi, ut ne alicuius momenti quantitatem negle-
xisse viderer, quod sane ex ipsius lineæ $M E$
magnitudine ultro apparebat; cæterum tempus
 K experimentis probatum suam sibi altitudinem
 $m E$ in calculis vindicat.

2. Methodus deinde mea suspicandi occa-
sionem præbuit, me in meridionali corporum
aberratione consideranda in errorem incidisse, pe-
rinde quasi, communi punctorum m , M , diur-
no motu omisso, existimaverim corpus a prima
perpendiculi $m M$ positione in absoluto & im-
mobili spatio $T D m Z$ recessurum suis solo ar-
cu $M d$, uti in (Fig. III.), non vero toto ar-
cu $M D$; lineola enimvero, sive circuli maxi-
mi $T D M Z$ tangentis parallelum $M N$ (Fig. I.)
in punto M arcus minimus $M d$ facile censeri

potest arcus paralleli ipsius $M N$; verum arcus $M D$, atque ideo punctum D , ad quod delapsum corpus offenderit, recedit satis a parallelo prædicto $M N$ meridiem versus: atqui opusculum meum meridionalem aberrationem hanc profitebatur futuram fore pene nullam. Prælau-

Fig. I. datus itaque Theodorus Bonati resecat lineolam $M E = M E$ (Fig. II.), agit rectam $E F$ normalem ad parallelum $M N$, et per similia triangula $M E F$, $M TN$, detegit $E F = EM$

$$\sqrt{\left(\frac{r^2 - \cos q}{r^2}\right)^2} = \frac{EM\sqrt{7}}{4} = \text{pollic. } 6\frac{1}{3}, \text{ quæ}$$

est distantia puncti D (Fig. II.) a parallelo $M N$. Quantitatatem hanc labentium corporum appellat aberrationem meridionalem, quam mihi obiicit orientali iam investigata quinques, & insuper maiorem.

3. Expedit autem, antequam respondeo, meridionalem istiusmodi aberrationem etiam augere: & re quidem vera, ducta recta eM parallela linea $M N$ corpus in meridiem devabit toto arcu $eM > EF$; arcum porro eM pro recta linea acceptum, ut hic licet, sequenti ratione deteges $EF : eM :: MN : TM$, unde

$$eM = \frac{EF \cdot TM}{MN} = \text{pol. } 6\frac{1}{3} \times \frac{4}{3} = \text{pol. } 8\frac{1}{3}. \text{ Hæc}$$

sane meridionalis aberratio est, quam se mihi Theodorus Bonati opposuisse arbitratus est; corpus enimvero delapsum recesserit a parallelo $M N$ in meridiem toto arcu eM .

4. Corpora ad meridiem sic vergere neutram certe inficiabor; verum aberratio hæc nequit per perpendicularum manifestari: præstat autem, antequam id ostendam, meridionalem istiusmodi aberrationem generali formula complecti.

Sit T centrum terræ, TP axis diurnæ revolutionis, P mundi polus, TQ radius æquatoris, $QM P$ circulus meridianus, MVR parallelus transiens per M , quo in puncto tangitur a circulo illo maximo DMZ , in cuius plano protenso iacet punctum m , ex quo corpus sibi relatum labi diximus per parabolam mCD in piano $TDmZ$ aere vacuo describendam (Arbic. I. Parag. 3.). Ducto per D parallelo eDp , quem inter eM & MVR interiacet meridiani arcus eM , erit eM meridionalis corporum aberratio, quæ vertitur in quæstione. Producto itaque radio TMm , ad quem normaliter deducatur recta DE , fiet EM sinus versus arcus MD ; atque ob arcum eM rectam lineam æmulantem, & quia punctum E est ad paralleli eDp diametrum eP , nancisceris triangula eM , TMN , rectilinca, & similia, ut propte-

42

pterea fuerit $EM : eM :: MN : TN$, unde
 $eM = \frac{EM \cdot TN}{MN}$. Hinc si nunc upaveris arcum
 $M D = \phi$, et terrestrem latitudinem $QM = \Psi$,
ut obtineas $ME = \sin. vers. \phi$, & $TN = \sin. \Psi$,
 $MN = \cos. \Psi$; facto $TM = 1$, consequeris
 $eM = \frac{\sin. \Psi \sin. vers. \phi}{\cos. \Psi}$, quam formulam re-
fert rursus in aliam traducere.

Lemma I.

5. Radium terræ sumam in posterum $TM = 1$. Numeris autem minuta temporis prima, secunda, tertia &c: experimentibus apponam paulo supra lineolas ', ", ", &c: , significantibus vero scrupula spatii prima, secunda &c. affigam signa ', ", ", &c: . Sit modo λ angulus diurnus a tellure absolvendus tempore $1''$; cum velocitas in motu æquabili par censeatur spatio per tempus diviso, velocitas angularis diurna telluris erit $\frac{\lambda}{1''}$, quo loco notabis constantem angulum λ ad divisorum circulorum arcus pertinere pro diversa locorum latitudine. Corporum autem in curvas abeuntium vis centrifuga, pro curvæ puncto quovis, eruitur per celebratissimum theorema ex qua-
dra-

43

drato velocitatis corporis, in curvæ puncto eodem, diviso per duplum osculi radius ad punctum ipsum: quare vis qua in puncto M sub latitudine $QM = \Psi$ corpora recessere conantur ab N centro paralleli MVR , erit $(\frac{\lambda}{1''})^2 \frac{1}{2 \cos. \Psi}$; est enim $\frac{\lambda}{1''}$ velocitas æquabilis diurna puncti M in parallelo MVR si loco λ suus sufficiatur arcus, estque $MN = \cos. \Psi$ radius osculi curvæ MVR ad puncta singula. Quod si velocitas diurna puncti M , quæ perpendiculariter dirigitur ad planum $PTQM$, ad alia quævis puncta T, t , axis tP , tamquam ad motus centrum referatur, patet vires centrifugas puncti M pro centris T, t , futuras fore $(\frac{\lambda}{1''})^2 \frac{1}{2 TM} = (\frac{\lambda}{1''})^2 \frac{1}{2}$, & $(\frac{\lambda}{1''})^2 \frac{1}{2 t M}$. Singulis igitur $1''$ punctum M recedere nitetur a centris N , T, t , spatiolis $\frac{\lambda^2}{2 \cos. \Psi}$, $\frac{\lambda^2}{2}$, $\frac{\lambda^2}{2 t M}$, quæ propteræ virium ipsarum effectus appellabo.

Lemma II.

6. Per literam β significatam intelligo telluris attractionem; quæ, terra a diurno motu quie-

quiescente, ubique superficiei exerceretur eadem. Tellure autem rotante, vis centrifuga $(\frac{\lambda}{l''})^2 \frac{l}{2 \cos. \Psi}$ in caussa est, quare corpora quiescentia, præter quæ in æquatore sunt atque in polis, non tendant in attractionis centrum T , sed in variabile aliud t , quod gravitatis centrum libenter appellabo: neque porro ad t exiguntur tota vi β , sed variabili alia θ , quam gravitatem dicam, vel corporum quiescentium pondus; erit autem sub æquatore $\theta = \beta - (\frac{\lambda}{l''})^2 \frac{l}{2}$, sub polis vero $\theta = \beta$. Corpora porro libere cadentia diriguntur utique ad centrum T , sed, si quæ sub polis integra vi β deorsum urgentur exceptias, cætera in labendo retrahuntur perpetuo ab eodem T vi centrifuga $(\frac{\lambda}{l''})^2 \frac{l}{2}$; quare labentia corpora censeri possunt deorsum exigi pondere, aut vi centrali $\Omega = \beta - (\frac{\lambda}{l''})^2 \frac{l}{2}$; quæ sub æquatore fiet $\Omega = \theta$, sub polis $\Omega = \theta = \beta$. Pendula denique, quippe quæ libere centrum petere impediuntur, sentiunt sibi semper indicatam vim centrifugam $(\frac{\lambda}{l''})^2 \frac{l}{2 \cos. \Psi}$, quæ in polis dumtaxat nulla est; gravitant igitur & ipsa in

in idem quiescentium corporum centrum t , & eadem vi θ ; quare vibrationes absolvunt uti si, diurno motu ablato, sollicitarentur gravitatis vi, vel pondere θ .

Lemma III.

7. Cum ad verborum circumloquutionem fu-
giendam mechanicis denominationibus novam ad-
iungere liceat; vim $(\frac{\lambda}{l''})^2 \frac{l}{2 \cos. \Psi} = \kappa$ *Axi-
fugam* appellabo, vires autem $(\frac{\lambda}{l''})^2 \frac{l}{2} = \varepsilon$,
& $(\frac{\lambda}{l''})^2 \frac{l}{2 t M} = \mu$, *Centrifugas*. Variabiles,
huiusmodi vires sunt sub polis nullæ, sub æqua-
tore una. Sit modo variabilis quantitas S spa-
tium, per quod primo l'' corpus libere cadit;
cum sint S , et $\frac{\lambda^2}{2 \cos. \Psi}$, variabilium virium $\beta - \varepsilon$,
et κ effectus eodem tempore producendi; cum-
que caassis effectus conferre fas sit, habebitur
 $\beta - \varepsilon : S :: \kappa : \frac{\lambda^2}{2 \cos. \Psi}$, unde $\kappa = \frac{\lambda^2 (\beta - \varepsilon)}{2 S \cos. \Psi}$
 $= \frac{\Omega \lambda^2}{2 S \cos. \Psi}$; similiter $\varepsilon = \frac{\beta \lambda^2}{2 S + \lambda^2}$, atque
 $\mu = \frac{\Omega \lambda^2}{2 S \cdot t M}$. Quod denique ad vim κ attinet
ani-

animadvertisam, quod appellata α vi centrifuga corporum sub æquatore, si feceris $1 : \alpha :: \cos \Psi : \alpha \cos. \Psi$, consequeris pro eadem latitudine Ψ æquationem $\alpha \cos. \Psi = \kappa$.

Lemma IV.

8. Differentia diurnorum arcuum a punctis m , M , describendorum tempore lapsus corporis de iis altitudinibus, ad quas in superficie nostra pertingere licet, ea est, ut in meridionali aberratione calculanda arcus alter pro altero accipi possit nullo prorsus discrimine.

Corollarium I.

9. Vires κ , ε , μ , rationem sequuntur $\frac{1}{\cos. \Psi}$, 1 , $\frac{1}{t M}$, (*Parag. 7.*) ; quare $\kappa : \varepsilon :: 1 : \cos. \Psi$ (& sic de aliis), unde $\kappa = \frac{\varepsilon}{\cos. \Psi} = \alpha \cos. \Psi$ (*Parag. 7.*), atque idcirco $\varepsilon = \alpha \overline{\cos. \Psi^2}$.

Corollarium II.

10. Sequenti inita proportione, *bore* 23. 56'. 54'', $1 : 360^\circ :: 1' : \lambda = 15''. 2''. 28'''$, hic erit anguli λ arcus diurnus in parallelo quoque absolvendus tempore Solis medio 1''. Angulus
igi.

igitur λ sub æquatore arcum circuli maximi intercipiet æqualem $15''. 2''. 28''' = \gamma$; quare hac ratione subducta $1 : \gamma :: \cos. \Psi : \gamma \cos. \Psi$, hic erit arcus circuli maximi qui pertinet ad angulum λ sub latitudine Ψ ; quamobrem arcus anguli $\lambda^2 = \gamma^2 \overline{\cos. \Psi^2}$. Hinc sub latitudine Ψ vires κ , ε , μ , evident $\kappa = \frac{\Omega \gamma^2 \cos. \Psi}{2 S}$,
 $\varepsilon = \frac{\beta \gamma^2 \overline{\cos. \Psi^2}}{2 S + \gamma^2 \overline{\cos. \Psi^2}}$, $\mu = \frac{\Omega \gamma^2 \overline{\cos. \Psi^2}}{2 S \cdot t M}$.

Scholion I.

11. Attractione β ita in duas decomposita, ut pars altera cum axifuga vi κ in æquilibrio sit, altera evadet quæsita θ , ut videbimus (*Parag. 21.*). Cave tum porro vim θ ad centrum t directam iterum vi centrifuga μ imminuas, ut quiescentium corporum, vibrantiumque pendulorum pondus obtineas, quod diximus iam (*Parag. 6.*) idem esse atque θ ; nam elisa vi axifuga κ , corpora quiescentia, ut & vibrantia pendula, suis in parallelis, non vero per parallelorum tangentes, circumagi coguntur; æque idcirco a quovis centro t semper, & ubique disita.

Scho.

Scholion II.

12. Cave accipias spatium S , atque idcirco $m M$, pro alterius vis effectu præter Ω . Nam ducta ordinata $E D$, tempus lapsus per parabolam $m C D$ idem utique est atque per $m E$ profunditatem integra attractione β conficiendam; quare cum sit $M E$ effectus eodem tempore dignendus ex vi ε , reliquum est, ut altitudo $m M$, de qua corpus ad superficiem nostram revera decidit, & qua sola prædicto tempore accedit ad centrum T , effectus sit vis $\beta - \varepsilon = \Omega$ (*Parag. 6, 7.*). $M E$ vero effectum esse vis ε sic probbo. Vis hæc singulis 1^o effectum edere valet $\frac{\lambda^2}{2}$ (*Parag. 5.*); quare nuncupato K tempore lapsus per $m C D$, ex legibus galileanis habebitur $1 : K^2 :: \frac{\lambda^2}{2} : \frac{K^2 \lambda^2}{2} = \frac{K^2 \gamma^2 \cos. \Psi}{2}$, qui

erit vis ε effectus tempore K gignendus. Cum vero punctum M diurno suo motu tempore 1^o arcum circuli maximi absolvat æqualem $\gamma \cos. \Psi$ (*Parag. 10.*), sequitur ut tempore K arcum compleat $K \gamma \cos. \Psi$, cui æqualem haberi posse diximus (*Parag. 8.*) arcum $M D$ tempore eodem a punto m , sive a corpore de m labente conficiendum. Sed arcum $M D$ sua cum subtensa

con-

confundere licet, estque subtensa media proportionalis diametrum inter $2 TM = 2$, & sinum versum ME ; fiet ergo $2 : K \gamma \cos. \Psi :: K \gamma$

$$\cos. \Psi : ME, \text{ proindeque } ME = \frac{K^2 \gamma^2 \cos. \Psi}{2};$$

quam quantitatem observavimus modo eandem utique esse atque effectum a vi ε tempore K producendum; ex quibus tuto inferes, spatium S , atque ideo $m M$, effectum esse vis $\beta - \varepsilon = \Omega$, ut supra dixi. Quamquam videbimus (*Parag. 16.*) censeri posse $\Omega = \theta$; ita ut corpora omnia in tellurem tendant vi, & pondere eodem; nisi quod communis quiescentium, atque vibrantium corporum (sive pendulorum) directio, alia est a libere labentium directione. Quod porro attinet ad dimetiendam iactus amplitudinem DE præfinito quovis tempore obtinendam, nihil refert utrum corpora deorsum festinent vi β , an Ω , an alia quavis; horizontali etenim velocitate præscripta, parabolicorum iactuum amplitudines temporibus ab initio lapsus defluxis proportionales fiunt, nulla habita ratione ad vim centralem, nisi si ex hac eadem tempus ipsius lapsus fuerit conficiendum.

d

Theor.

Theorema I.

13. Sub sphæroideæ telluris nostræ æquatore est $\varepsilon = \kappa = \mu = \alpha = \frac{1}{288,031}$ attractionis β . Demonstratio.

Habemus sub æquatore nostro $S = \text{pedib. } 15,0515, TQ = \text{ped. } 19680648$, estque $\cos. \Psi = 1$, $\gamma = \frac{TQ}{13713}$; ex quibus, posita attractione $\beta = 1$, per æquationem $\varepsilon = \frac{\beta \gamma^2 \cos. \Psi}{2S + \gamma^2 \cos. \Psi}^2$ (Parag. 10.) obtinetur $\varepsilon = \alpha = \frac{1}{288,031}$ ipsius β ; quod erat demonstrandum.

Corollarium III.

14. Hinc sub æquatore nostro erit $\Omega = \theta = \beta - \varepsilon = 0, 996535$ ipsius $\beta = 1$; proindeque integræ vis β effectus æqualis pedib. 15, 10383; atque ideo effectus vis ε æqualis lineis 7, 5355.

In virium existimatione facienda illud observandum sedulo est, ne vires ipsas ad diversam referas unitatem; quod in vitium tum præcipue labi pronum est, quam de sphæroidea tellure sermo habeatur.

*Theo.**Theorema II.*

15. Sumpta denuo altitudine $mM = a$, cum sit $eM = \frac{\sin. \Psi \sin. \text{vers. } \Phi}{\cos. \Psi}$ (Parag. 4.), quam formulam in aliam me conversurum esse promisi, dico fieri $eM = \frac{a \kappa \sin. \Psi}{\Omega}$. Demonstratio.

Posuimus (Parag. 4.) $MD = \phi$; vidimus (Parag. 11.) $ME = \sin. \text{vers. } MD = \sin. \text{vers. } \phi = \frac{K^2 \gamma^2 \cos. \Psi}{2}$; ex legibus galileanis est $1 : K^2 :: S : a$, unde $K^2 = \frac{a}{S}$; igitur $\sin. \text{vers. } \phi = \frac{a \gamma^2 \cos. \Psi}{2S}$. Nacti præterea sumus $\kappa = \frac{\Omega \gamma^2 \cos. \Psi}{2S}$ (Parag. 10.), unde $\frac{\gamma^2 \cos. \Psi}{2S} = \frac{\kappa}{\Omega}$; ergo $\sin. \text{vers. } \phi = \frac{a \kappa \cos. \Psi}{\Omega}$, unde $eM = \frac{\sin. \Psi \sin. \text{vers. } \phi}{\cos. \Psi} = \frac{\sin. \Psi}{\cos. \Psi} \times \frac{a \kappa \cos. \Psi}{\Omega} = \frac{a \kappa \sin. \Psi}{\Omega}$; quod erat ostendendum.

d 2

Co-

Corollarium IV.

16. Sit V spatium constans, quod ubique sphæricæ superficie telluris a diurno motu quiescentis corpora primo λ^2 in labendo emetuntur propter vim β ; cum sit (Parag. 11.) $\beta = \Omega$, unde $\beta - \Omega = \varepsilon$, æquationem hanc inter virium ipsarum effectus instituas licebit $V - S = \frac{\lambda^2}{2}$
 $= \frac{\gamma^2 \cos. \Psi}{2}$ (Parag. 5, 7, 10); ex qua $S = V - \frac{\gamma^2 \cos. \Psi}{2}$, ubi quantitates V, γ , constantes sunt.

Corollarium V.

17. Restituto valore $\frac{\lambda^2}{\Omega} = \frac{\gamma^2 \cos. \Psi}{2S}$, substitutoque $S = V - \frac{\gamma^2 \cos. \Psi}{2}$, fiet $e M$
 $= \frac{a \gamma^2 \sin. \Psi \cos. \Psi}{2V - \gamma^2 \cos. \Psi}$; sed est sub polis $\cos. \Psi = 0$, sub æquatore $\sin. \Psi = 0$, fiet igitur utrobique $e M = 0$.

*Theo-**Theorema III.*

18. Arcus $e M$ fit maximus ea sub latitudine Ψ , cuius fuerit $\sin. \Psi : \cos. \Psi :: \sqrt{V - \frac{\gamma^2}{2}} : \sqrt{V}$. Demonstratio.

Formulæ $e M$ valore $\frac{a \gamma^2 \sin. \Psi \cos. \Psi}{2V - \gamma^2 \cos. \Psi}$ dif-

ferentiato, positoque differentiali æquali zero, ut *Maximorum, Minimorumque* doctrina fert, ad hanc ultimo æquationem devenies $\cos. \Psi = \sin. \Psi$
 $\sqrt{\left(\frac{V}{V - \frac{\gamma^2}{2}}\right)}$, ex qua evolvitur proportionalitas $\sin. \Psi : \cos. \Psi :: \sqrt{V - \frac{\gamma^2}{2}} : \sqrt{V}$; quod erat demonstrandum.

Corollarium VI.

19. Cum effectus vis centrifugæ α (Parag. 7.) sub æquatore sit $\frac{\lambda^2}{2} = \frac{\gamma^2}{2}$ (Parag. 10); æquatione vires inter & effectus constituta, fiet $\cos. \Psi : \sin. \Psi :: \sqrt{\beta} : \sqrt{\beta - \alpha}$; idest arcus $e M$ fit maximus ea sub latitudine Ψ , cuius *co-sinus* ad *sinum* rationem obtineat, quam virium attractionis, & gravitatis radices sequuntur sub

d 3

æqua-

æquatore. Huiusmodi autem latitudo Ψ paululum minor est quam graduum quadraginta quinque.

20. Hactenus perpendiculum $m M$ consedit in plano $T D m Z$, neque orientali aberrationi nocebat quicquam: nunc vero hinc eiiciendum est, ut meridionalem aberrationem $e M$ de qua Theodorus Bonati egit, nullam ex perpendiculo manifestari posse patefaciamus: Sit itaque (Fig.VI.) AB axis, cui firmiter iuncta sint puncta T, m , sitque T centrum virium quodvis. Corpus profecto M puncto m per filum $m M$ adnexum dirigetur ad T in rectam lineam $m M T$, adhuc dum omnia quiescunt. Mente nunc concipiamus puncta T, m , normaliter ad AB in circulis parallelis circumagi velocitatibus suis ab axe AB distantiis proportionalibus; corpus sane M ut ab axe liberum, ab eo fugere nitetur; recedet autem per $M r$ arcum circuli, cuius radius est $m M = mr$, remanebit vero in plano $B m r TA$; neutro enim ab hoc declinatum quiesceret, quippe vi centrali T ad huiusmodi planum iterum revocaretur. Perpendiculum igitur $m M$, atque ideo suspensum corpus M , eo denique in solo puncto r consistere poterit, contra quod vis centralis, quam dicam Tr , sic agat, ut si in duas resolvatur TH, Hr , pars altera TH ad

AB

AB normalis consumatur ad vim axifugam corporis in r elidendam, altera Hr ad m directa impendatur ad corpus in r per rectam $m r H$ dorsum exigendum. Patet igitur diurnam telluris revolutionem circa axem TP in caussa esse, cur (Fig. V.) perpendiculum $m M$ centrum attractionis T recta respicere prohibeatur, neque corpus M dorsum prematur integra vi β , ut diximus (Parag. 6); quamobrem, interim dum corpus de m delabitur in D , perpendiculum $m M$ una cum tellure venerit utique in directum ad punctum D , idest in eodem prope meridianio cum D reperietur; atque abs attractionis directione $m T$ ad meridiem conversum, meridionalem delapsi corporis aberrationem $e M$ penitus delebit. Præstat autem sequenti problemate rem clarius explanare.

Problema I.

21. Sit T sphæricæ telluris centrum cum (Fig.VI.) figuræ, tum attractionis, $t P$ axis diurnæ rotationis, TQ radius æquatoris, $QM P$ circulus meridianus. Perpendiculum $m M$ de recta $m M T$ vi axifuga repulsum quiescat in $m r t$; quæritur angulus $r m M$. Solutio .

Accipiatur, ut supra, $QM = \Psi$, β attrac-

d 4

ctio

ctio centri T , & x vis axifuga puncti r , quæ ab axifuga punctorum M, q , differet nihil. Vocetur angulus $r m M = \varphi$, qui sane is erit, ut puncta M, r, q , terrestrem latitudinem censemantur habere eamdem, & lineæ $T M = T q$, $T r$, æquales, & parallelæ existentur. Sumatur denique radius $T M = T r = \beta$, producaturque directio $m r$ in H , ut vis $T r$ decomponatur in duas $H T, H r$, quarum prima normalis erit ad axem TP , & opposita ex diametro vi x , transibit altera per suspensionis punctum m .

Ob parallelas $T M, T r$, erit angulus $r m M = H r T = \varphi$, & $Q T M = Q T r = \Psi$, atque externus $Q H r =$ internis $Q T r + H r T = \Psi + \varphi$; sed $T r : T H : : \sin. T H r = \sin. Q H r : \sin. H r T$, videlicet $\beta : T H : : \sin. (\Psi + \varphi) : \sin. \varphi$; ergo $T H = \frac{\beta \sin. \varphi}{\sin. (\Psi + \varphi)}$. Postulat autem problema ut attractionis β pars $T H$ in æquilibrio sit cum x vi axifuga puncti r ; erit ergo $T H = \frac{\beta \sin. \varphi}{\sin. (\Psi + \varphi)} = x$, idest $\beta \sin. \varphi = x \sin. (\Psi + \varphi)$
 $= x (\sin. \Psi \cos. \varphi + \sin. \varphi \cos. \Psi) = x (\sin. \Psi \sqrt{(1 - \sin^2 \varphi)} + \sin. \varphi \cos. \Psi)$; quare $\beta \sin. \varphi - x \sin. \varphi \cos. \Psi = x \sin. \Psi \sqrt{(1 - \sin^2 \varphi)}$, & quadrando $\sin^2 \varphi (\beta - x \cos. \Psi)^2 = x^2 \sin^2 \Psi$

(1)

$$(1 - \sin^2 \varphi), \text{ unde } \sin^2 \varphi (\beta^2 - 2 \beta x \cos. \Psi + x^2 \cos^2 \Psi + x^2 \sin^2 \Psi) = x^2 \sin^2 \Psi, \text{ idest} \\ \sin^2 \varphi (\beta^2 - 2 \beta x \cos. \Psi + x^2) = x^2 \sin^2 \Psi, \\ \text{ & radicem extrahendo,} \\ \sin. \varphi = \frac{x \sin. \Psi}{\sqrt{\beta^2 - 2 \beta x \cos. \Psi + x^2}}.$$

Corollarium I.

22. Angulus φ pertinet ad circulum telluris maximem, cuius radius est $T M = 1$; si ipsum igitur ad circulum transferre volueris, cuius radius sit $M m = a$, ut habeas sinum arcus $M r$, pones $1 : a :: \sin. \varphi : \sin. M r$; quare $\sin. M r = a \sin. \varphi = \frac{a x \sin. \Psi}{\sqrt{\beta^2 - 2 \beta x \cos. \Psi + x^2}}$. Cum ita-

que arcuum minimorum sinibus arcus ipsos sufficere fas sit, habebitur arcus

$$M r = \frac{a x \sin. \Psi}{\sqrt{\beta^2 - 2 \beta x \cos. \Psi + x^2}}.$$

Theorema I.

23. Vis $H r$, qua perpendicularum, sive corpus quodcumque quiescens in r , gravitat per $m r H$ in tellurem, quam vim (Parag. 6) applicavimus θ , fit $H r = \sqrt{\beta^2 - 2 \beta x \cos. \Psi + x^2}$. *Demonstratio.*

De-

58

$$\begin{aligned}
 \text{Est } Tr = \beta : Hr :: \sin. (\Psi + \varphi) : \sin. \Psi, \\
 \text{unde } Hr = \frac{\beta \sin. \Psi}{\sin. (\Psi + \varphi)} \\
 = \frac{\beta \sin. \Psi}{\sin. \Psi \cos. \varphi + \sin. \varphi \cos. \Psi}; \text{ obtinuimus mo-} \\
 \text{do } \sin. \varphi = \frac{\kappa \sin. \Psi}{\sqrt{\beta^2 - 2 \beta \kappa \cos. \Psi + \kappa^2}}, \text{ unde} \\
 \cos. \varphi = \sqrt{(1 - \sin. \varphi^2)} \\
 = \sqrt{\left(\frac{\beta^2 - 2 \beta \kappa \cos. \Psi + \kappa^2 - \kappa^2 \sin. \Psi^2}{\beta^2 - 2 \beta \kappa \cos. \Psi + \kappa^2} \right)} \\
 = \frac{\beta - \kappa \cos. \Psi}{\sqrt{\beta^2 - 2 \beta \kappa \cos. \Psi + \kappa^2}}, \text{ proindeque } Hr \\
 = \frac{\beta \sin. \Psi \sqrt{\beta^2 - 2 \beta \kappa \cos. \Psi + \kappa^2}}{\beta \sin. \Psi}, \text{ idest} \\
 Hr = \theta = \sqrt{\beta^2 - 2 \beta \kappa \cos. \Psi + \kappa^2}; \text{ quod erat demonstrandum.}
 \end{aligned}$$

Corollarium II.

24. Fiet igitur meridionalis perpendiculari aberratio $Mr = Mq = \frac{a \kappa \sin. \Psi}{\theta}$.

Corollarium III.

25. Meridionalem labentium corporum aberratio-

$$\begin{aligned}
 & \text{errationem invenimus (Fig. V. Parag. 15) } eM \\
 & = \frac{a \kappa \sin. \Psi}{\Omega}; \text{ vidimus (Parag. 6, 7.) } \Omega = \beta - \varepsilon, \\
 & \& (\text{Parag. 9}) \kappa : \varepsilon :: 1 : \cos. \Psi; \text{ unde } \varepsilon = \kappa \cos. \Psi, \\
 & \text{atque } \Omega = \beta - \kappa \cos. \Psi; \text{ quamobrem } eM \\
 & = \frac{a \kappa \sin. \Psi}{\beta - \kappa \cos. \Psi}, \text{ ideoque } eM : Mr \\
 & :: \sqrt{\beta^2 - 2 \beta \kappa \cos. \Psi + \kappa^2} : \beta - \kappa \cos. \Psi.
 \end{aligned}$$

Corollarium IV.

26. Cum sit $\sqrt{\beta^2 - 2 \beta \kappa \cos. \Psi + \kappa^2} > \beta - \kappa \cos. \Psi$, id est $1 > \cos. \Psi^2$ (nam $1 = \cos. \Psi^2$ fit tantum sub latitudine $\Psi = 0$, ubi habetur $eM = Mr = 0$), erit etiam $eM > Mr$; discriminem porro est ferme nullum; radicali enim vero valore extracto, neglectis terminis per quantitatem minimam κ^2 ductis, fiet $\sqrt{\beta^2 - 2 \beta \kappa \cos. \Psi + \kappa^2} = \beta - \kappa \cos. \Psi$; quapropter existimari potest $\Omega = \theta$ (Parag. 12), atque idcirco $eM = Mr$. Quantum igitur corpus in labendo vergit ad meridiem ob diurnum terræ motum; tantumdem, & eadem de causa eodem vergit perpendiculari, quod propterea meridionalem labentium corporum aberrationem a Theodoro Bonati consideratam manifestabit nullam.

Co-

Corollarium V.

27. Latitudine Ψ quavis accepta, arcus $M r$ proportionalis erit radio $m M = a$; igitur quod de simplici perpendiculo dictum est, idem valet de composito, angulus enim ϑ constans est pro quavis perpendiculi longitudine. Hinc illud etiam sequitur, ut meridionalis tum perpendiculi, tum labentis corporis aberratio sit ubique telluris rectilinea. Quæ autem de aberratione $e M$ dicta sunt (*Parag. 17, 18, 19*) valent, cæteris paribus, de aberratione $M r$.

Corollarium VI.

28. Vidimus (*Parag. 21, 23*) $\sin. \varphi = \frac{\kappa \sin. \Psi}{\theta}$
 $= \frac{\alpha \sin. \Psi \cos. \Psi}{\beta - \alpha \cos. \Psi}$ (*Parag. 7, 26*); si itaque posueris $\Psi = 45^\circ$, $\beta = 1$, $\alpha = \frac{1}{288,631}$ (*Parag. 13*) ipsius β ; fiet $\sin. \varphi = \varphi = \frac{1}{577,262}$;

est porro radius $1 = 57^\circ : 17' : 44'' : 48'''$; ergo $\varphi = 5' : 57'' : 19'''$; quod ipsum ex sphæroideæ telluris nostræ theoria eruitur, ut videbimus (*Parag. 47*).

*Theo.**Theorema I I.*

29. Si fuerit K tempus lapsus de altitudine $m M = a$ per spatium vacuum, & $K+t$ per atmosphærām; aberratio meridionalis labentium corporum obtineretur $e M = \frac{a(K+t)^2 \times \sin. \Psi}{\theta K^2}$.

Demonstratio.

Meridionalis aberratio proportionem sequitur altitudinis, de qua corpus decidit (*Parag. 27*); si itaque, ut galileanæ leges postulant, feceris $K^2 : a :: (K+t)^2 : \frac{a(K+t)^2}{K^2}$; hæc erit altitudo subroganda loco a pro tempore $K+t$; neque enim ex mutata altitudine, mutata quoque velocitatum diurnarum punctorum m , M , differentia errorem invehet ullum (*Parag. 8*); quare evadet $e M = \frac{a(K+t)^2 \times \sin. \Psi}{\theta K^2}$; quod erat demonstrandum.

Corollarium VII.

30. Meridionalis aberratio $e M$ ex periculis in aperto aere faciendis expectanda crescat ultra perpendiculi aberrationem $M r$; perpendiculi enim angulus ϑ idem est adsit aer nec ne. Discrimen hoc in caussa est, quare meridionalis

lis aberratio labentium corporum haberi quandoque posse orientali maior; quod unum in opusculo meo, animadversione ceteroquin dignum, prætermiseram.

Scholion I.

31. Diurnus conicus motus aeris transeuntis per immobile planum $T D m Z$, per quod corpus labitur, atque in boream tendentis, meridionalem ipsius corporis aberrationem $e M$ pauculum imminuet; id autem obiter observasse sufficiat.

Theorema III.

32. Sphæricum corpus super telluris sphæricæ, vel sphæroideæ, superficie quiescere non potest, nisi plano incumbat, cui normale sit perpendiculum. Demonstratio.

(Fig. VI.) Conquiescat corpus sphæricum in q , facto æquilibrio inter ipsius axifugam vim, & attractionis β partem TH ; ipsum urgetur sola gravitate, vel pondere θ per directionem rqH (Parag 6), ita scilicet ut perpendiculi directio $m r$ transeat per contactus punctum q , id est normalis sit plano, cui sphæricum corpus insidet; quod erat demonstrandum.

Co-

Corollarium VIII.

33. Quod de sphærico corpore dictum modo est, extenditur æque ad quiescentes fluidas superficies, quibus propterea perpendicularum ubique terrarum normale sit oportet. Hoc tanquam hydrostaticum principium ratione, & experientia probatum, adhuc receptum fuit; demonstratione autem fulcitum fuisse, credo ego, iuvabat.

Corollarium IX.

34. Aquæ sub æquatore altius quam alibi extollantur oportet; atqui neque ubique sub æquatore aquæ terris imminent, neque montes supra mare altius elevantur sub polis quam sub æquatore; solida ergo tellus nostra sphæroideam & ipsa æmulatur formam, in quam fluida superstrata pars sese componat necesse est; idque præsertim cum maxima marium profunditas ne sextam quidem partem differentiæ semidiametrorum telluris attingat. Diurno porro motu ablatto, aquæ, altissimis æquatoris maribus exsiccatis, ad polos dilaberentur.

Schœ-

Scholion II.

35. Sit itaque semiaxis telluris $OB < OQ$ radio æquatoris, sitque $QM PB$ ellipticus meridianus. Centrum figuræ telluris cadet in O ; vis β variabilis erit, variumque centrum attractionis, quod dabitur in radio OQ pro latitudine $\Psi = 0$, & in OB pro $\Psi = 90^\circ$; cuiusvis autem puncti q attractionis directio qT erit semper ad aliquod punctum T radii OQ . Corpora libere cadentia de m ferentur in immobili plano transeunte per rectam Tm normaliter ad $BmQO$, interim dum perpendicularum mr , & corpora quiescentia in q , gravitabunt per rectam mrq in radii OQ variable punctum H ; quamobrem rectam mH gravitatis directionem appellabo (*Parag. 6*). De angulo HmO , ad quem perpendicularum mr cum telluris radio mO sese componit, mentio passim habetur apud astronomiæ Authores; eruitur enim ex elliptico meridiano $QM B$ per semiaxiū OB , OQ , differentialiam iuxta hydrostaticum prædictum principium (*Parag. 33.*); vel ex revolventis telluris theoria, ut paulo infra videbimus. De angulo autem HmT , quem faciunt in q attractionis, gravitatisque directiones, neminem dum scripsisse credo; etenim ne apud eos quidem, qui

de

de telluris theoria expresse tradiderunt, verbum de ipso offendi.

Scholion III.

36. Vidimus (*Parag. 23.*)

$$\theta = \sqrt{\beta^2 - 2\beta x \cos \Psi + x^2}$$

$$= \sqrt{\beta^2 - 2\alpha\beta \cos \Psi + \alpha^2 \cos^2 \Psi} \quad (\text{Par. 7}),$$

quæ æquatio habetur quantitates inter θ , α , β , $\cos \Psi$; sed β est constans, α , & θ innotescere possunt ex hysocronorum pendulorum longitudinibus observatis sub polis, æquatore, & latitudine quavis Ψ ; quantatum ergo θ , & α valoribus per pendulorum longitudines detectis, inque æquationem

$$\theta = \sqrt{\beta^2 - 2\alpha\beta \cos \Psi + \alpha^2 \cos^2 \Psi} \text{ invectis,}$$

incognitæ latitudinis Ψ cuiusvis eruetur $\cos \Psi$; idest paralleli cuiusvis radius detegetur. Cave porro id ipsum ad tellurem sphæroideam transferas; tum enim attractio β variationem subit: nisi quod posita $\beta = F \cos \Psi$ (ubi est F functio latitudinis Ψ ex telluris figura determinanda), latitudo Ψ , parallelique cuiusvis radius eadem ac innuimus via poterit determinari. Cum denique demonstraverim haberi posse $\Omega = \theta$ (*Parag. 26*) pro actuali diurno telluris motu;

e

pa.

patet ex pendulorum longitudinibus educi posse de quoniam spatio S , quod est vis Ω effectus (Parag. 7), labi debeant corpora sub latitudine quavis adhuc incognita.

37. Antecedens problema solui pro perpendiculari altitudine b , quæ ad terræ radium proportionem obtineat quamvis; atque pro vi centrifuga sub æquatore quavis f , idest dato quovis diurno motu. Generalem solutionem pro tellure sphærica iis hic evolvendam trado, qui calculis indulgere velint plusquam opusculum hoc ferre poterat; estque hæc, $\beta \sin. \vartheta (1 + b)$
 $= f \sin. (\Psi + \vartheta) (\cos. \Psi + 2b \sin. (\Psi + \frac{\vartheta}{2}))$
 $\sin. \frac{\vartheta}{2}) (1 + 4 \overline{\sin. \frac{\vartheta}{2}}^2 (b^2 + b))^{3/2}$ in qua
 incognita evolvenda est $\sin. \vartheta$.

38. Responsio hæc mea Theodoro Bonati arridere multum visa est; quod etsi satis habuerim, referre tamen existimavi, si hic ultimo ea potissimum delibarem, quæ hac super re a celeberrimis Authoribus tradita sunt; ut in aperto ponatur, omnia mecum inter eosdem perbelle convenire, meque nihil nunc exhibere, quod non ex ipsorum doctrinis eliciatur, quamquam id ipsi evolvere prætermiserint.

39. Sit ω semiaxium telluris OQ , OB differentia: demonstratum est corpus (idemque dices de suspenso perpendiculari) in superficie nostra collocatum sub latitudine quavis Ψ relata ad centrum figuræ O , attrahi viribus $\sin. \Psi (1 + \frac{9\omega}{5})$, & $\cos. \Psi (1 + \frac{3\omega}{5})$, per directiones minori axi $OB = 1$, & maiori $OQ = 1 + \omega$, parallelas; idque si tellus a diurno motu abstineat. Eadem porro sub latitudine Ψ , si tellus diurno motu cieatur, vis axisfuga in caussa est, quare attractionis pars $\cos. \Psi (1 + \frac{3\omega}{5})$ imminuatur, si atque $\cos. \Psi (1 - \frac{\omega}{5})$, parte altera intacta manente. Demonstratum denique est, acceptumque, esse $\omega = \frac{1}{230}$ semiaxis OB .

40. Termini per quantitatem minimam ω^2 ducti ab hisce formulis expulsi sunt; quod in posterum quoque præstabō: ex iis autem quæ sequantur observemus. Agatur tellus diurno motu nec ne, latitudo perpendiculari MM' censi potest constans. Dirigatur itaque per r recta $rS = \cos. \Psi (1 + \frac{3\omega}{5})$ parallela radio OQ , & $rL = \sin. \Psi (1 + \frac{9\omega}{5})$ parallela OB ; ducta

projecto diagonali rT . in rectangulo $LTSr$,
 erit $rT = \sqrt{rS^2 + rL^2} = 1 + \frac{\omega}{5} (9 \sin. \Psi^2 + 3 \cos. \Psi^2) = \beta$; idest corpus sub latitudine Ψ attractionem sentiet $rT = \beta$, eritque variabilis vis β directio rT . Accepta porro super recta rS portione $rX = \cos. \Psi (1 - \frac{\omega}{5})$, completoque rectangulo XL , erit huius diagonalis $rH = \sqrt{rX^2 + rL^2} = 1 + \frac{\omega}{5} (9 \sin. \Psi^2 - \cos. \Psi^2) = \theta$; idest corpora quiescentia sub latitudine Ψ gravitabunt in H vi θ , & directione rH . His praevisis sit.

Lemma I.

$$\begin{aligned} 41. \text{ Est } & \frac{\sin. (\Psi \pm \delta)}{\cos. (\Psi \pm \delta)} = \frac{\sin. \Psi}{\cos. \Psi} \\ & \pm \frac{\sin. \delta}{\cos. \Psi \cos. (\Psi \pm \delta)}; \text{ etenim } \cos. \Psi \sin. (\Psi \pm \delta) \\ & = \sin. \Psi \cos. (\Psi \pm \delta) \pm \sin. \delta = \sin. \Psi (\cos. \Psi \cos. \delta \mp \sin. \Psi \sin. \delta) \pm \sin. \delta = \sin. \Psi \cos. \Psi \cos. \delta \pm \sin. \delta \frac{\sin. \Psi}{\cos. \Psi} = \cos. \Psi \sin. (\Psi \pm \delta); \\ & \text{quæ æquatio identica est.} \end{aligned}$$

*Lem-**Lemma II.*

42 Expunctis terminis per ω^2 ductis, erit $\frac{5+9\omega}{5+3\omega} = 1 + \frac{6\omega}{5} \& \frac{5+9\omega}{5-\omega} = 1 + 2\omega$. Quod per actualem divisionem potest per se quisque experiri.

Problema II.

43. Acto telluris radio Or , nuncupatoque angulo $rOQ = mOQ = \Psi$, qui angulus latitudinis est pro punctis r, q, m, M ; angulum invenire $TrO = TmO$. Solutio.

$$\begin{aligned} \text{Dicatur } & \text{angulus } rTQ = mTQ = \pi; \text{ ex rectangulo } LS \text{ habebitur } rS : TS = rL :: \cos. \pi : \sin. \pi, \text{ idest (Parag. 40) } \cos. \Psi (1 + \frac{3\omega}{5}) : \\ & \sin. \Psi (1 + \frac{9\omega}{5}) :: \cos. \pi : \sin. \pi; \text{ unde } \frac{\sin. \pi}{\cos. \pi} \\ & = \frac{\sin. \Psi}{\cos. \Psi} \frac{(5+9\omega)}{(5+3\omega)} = \frac{\sin. \Psi}{\cos. \Psi} + \frac{6\omega \sin. \Psi}{5 \cos. \Psi} \\ & (\text{Parag. 42). Est vero angulus externus } rTQ = \pi \\ & = TOr + TrO; \text{ igitur vocato } TrO = \delta, \\ & \text{erit } \pi = \Psi + \delta, \text{ quare } \frac{\sin. \pi}{\cos. \pi} = \frac{\sin. (\Psi + \delta)}{\cos. (\Psi + \delta)} \\ & = \frac{\sin. \Psi}{\cos. \Psi} + \frac{6\omega \sin. \Psi}{5 \cos. \Psi}; \text{ sed est (Parag. 41) } \end{aligned}$$

sin.
e 3

70

$$\begin{aligned} \frac{\sin. (\Psi + \delta)}{\cos. (\Psi + \delta)} &= \frac{\sin. \Psi}{\cos. \Psi} + \frac{\sin. \delta}{\cos. \Psi \cos. (\Psi + \delta)}; \\ \text{igitur } \frac{\sin. \delta}{\cos. (\Psi + \delta)} &= \frac{6 \omega \sin. \Psi}{5}; \text{ videlicet } \sin. \delta \\ &= \frac{6 \omega \sin. \Psi}{5} (\cos. \Psi \sqrt{1 - \sin^2 \delta} - \sin. \Psi \sin. \delta), \\ \& \text{ quadrando, ut radicale signum removeatur,} \\ &\frac{\sin^2 \delta}{5} \left(1 + \frac{12 \omega \sin. \Psi^2}{5} + \frac{36 \omega^2 \sin^2 \Psi}{25} \right) \\ &= 36 \omega^2 \sin^2 \Psi \cos^2 \Psi (1 - \sin^2 \delta); \text{ reducen-} \\ &\text{do denique, \& radiçem extrahendo, ut incogni-} \\ &\text{ta quæsita quantitas seiungatur, erit} \\ \sin. \delta &= \frac{6 \omega \sin. \Psi \cos. \Psi}{5 + 6 \omega \sin. \Psi}. \end{aligned}$$

Theorema I.

44. Vocato angulo $HrO = HmO = \sigma$,
erit $\sin. \sigma = \frac{2 \omega \sin. \Psi \cos. \Psi}{1 + 2 \omega \sin. \Psi}$. Demonstratio.

Cum sit angulus externus $QHr = QOr + HrO = \Psi + \sigma$; cumque in rectangulo $X L$ obtineatur $rX : rL :: \cos. QHr : \sin. QHr$; erit (Par. 40)
 $\cos. \Psi (1 - \frac{\omega}{5}) : \sin. \Psi (1 + \frac{9\omega}{5})$

::

71

$$\begin{aligned} :: \cos. (\Psi + \sigma) : \sin. (\Psi + \sigma); \text{ quare} \\ \frac{\sin. (\Psi + \sigma)}{\cos. (\Psi + \sigma)} &= \frac{\sin. \Psi}{\cos. \Psi} \left(\frac{5 + 9\omega}{5 - \omega} \right); \text{ idest} \\ (\text{Parag. 41}) \quad &\frac{\sin. \Psi}{\cos. \Psi} + \frac{\sin. \sigma}{\cos. \Psi \cos. (\Psi + \sigma)} \\ &= \frac{\sin. \Psi}{\cos. \Psi} + \frac{2 \omega \sin. \Psi}{\cos. \Psi} \quad (\text{Parag. 42.}); \text{ unde} \\ \frac{\sin. \sigma}{\cos. (\Psi + \sigma)} &= 2 \omega \sin. \Psi; \text{ quæ æquatio il-} \\ \text{li similis est, quam modo (Parag. 43) tracta-} \\ \text{vimus; nisi quod ponendum est } \delta = \sigma, 5 = 1, \\ 6 = 2; \text{ ex quibus habebitur} \\ \sin. \sigma &= \frac{2 \omega \sin. \Psi \cos. \Psi}{1 + 2 \omega \sin. \Psi}; \text{ quod erat ostendendum.} \end{aligned}$$

Corollarium I.

45. Sinus angulorum minimorum arcibus
ipsis æquiparari possunt: erit igitur arcus anguli $HrT = HrO - TrO = \sigma - \delta$
 $= \frac{2 \omega \sin. \Psi \cos. \Psi}{1 + 2 \omega \sin. \Psi} - \frac{6 \omega \sin. \Psi \cos. \Psi}{5 + 6 \omega \sin. \Psi}$
 $= \frac{4 \omega \sin. \Psi \cos. \Psi}{5 + 16 \omega \sin. \Psi} = \sin. HrT = \sin. HmT,$
quem aberrantis perpendiculi angulum appella-

c 4

vi-

vimus φ (Parag. 21), invenimusque $\sin. \varphi =$
arcui anguli $\varphi = \frac{\kappa \sin. \Psi}{\theta}$.

Corollarium II.

46. Formularum $\cos. \Psi (1 + \frac{3\omega}{5})$, $\cos. \Psi (\frac{1 - \omega}{5})$ (Parag. 39) differentia, idem est ac vis axifuga pro latitudine Ψ , quæ idcirco fiet $\kappa = \frac{4\omega \sin. \Psi}{5}$; quod idem exhibet æquatio $\kappa \cos. \Psi = \kappa$ (Parag. 7); etsi hæc ad tellurem sphæricam, illa ad sphæroideam, pertineant. Valore autem κ pro ω substituto habebitur $\sin. HmT = \frac{\kappa \sin. \Psi}{1 + \frac{4\kappa \sin. \Psi}{\cos. \Psi}}$.

Theorema I I.

47. Est $\sin. HmT$, modo deductus ex Authorum theoriis de tellure sphæroidea, æqualis $\sin. \varphi = \frac{\kappa \sin. \Psi}{\theta}$, ut pro tellure sphærica detexi (Parag. 21). Vidimus enim (Parag. 40)

$$\theta =$$

$\theta = 1 + \frac{\omega}{5} (9 \overline{\sin. \Psi}^2 - \overline{\cos. \Psi}^2)$
 $= 1 + \kappa \left(9 \frac{\overline{\sin. \Psi}^2 - \overline{\cos. \Psi}^2}{4 \cos. \Psi} \right)$ (Parag. 46);
quæ quantitas vix differt abs $1 + \frac{4\kappa \sin. \Psi}{\cos. \Psi}$;
quapropter haberi utique potest $\sin. HmT =$
 $\sin. HrT = \frac{\kappa \sin. \Psi}{\theta} = \sin. \varphi$. Et re quidem
vera, posita latitudine $\Psi = 45^\circ$, fit angulus
 $HmT = \frac{4\omega \sin. \Psi \cos. \Psi}{5 + 16\omega \sin. \Psi}$ (Parag. 45) $= \frac{1}{579}$
 $= 5' . 56'' . 15'''$, qui nihil fere distat ab angulo φ , quem obtinuimus (Parag. 28).

Corollarium III.

48. Angulus pariter, quem facit attractio-
nis directio rT cum radio rO sub latitudine
graduum 45 eruitur $\delta = 8' . 56'' . 41'''$; ut pro-
pterea fiat angulus $\sigma = HmT + \delta = 14' . 52'' . 56'''$;
ut ex angulorum ipsorum valoribus (Parag. 43,
44) eruere licet.

49. Nolim tamen hæc ita accipias, quasi
mathematico rigore fuerint demonstrata; pro-
blemata enim pro sphærica, & sphæroidea tel-
lu-

Iure seiunctim soluta discrimen aliquod secum ferant necesse est: profecto alia via angulum σ investigant Astronomi accuratiores, deteguntque $\sigma = 14' . 59''$ (*Cagnoli Trigonometr. Parag. 807*); quare & angulus $H m T$ fiet æqualis $5' . 58'' . 40''$, qui paululum maior est angulo γ. Sed ut quid plura? in animo enim erat probare, ea ex celeberrimorum virorum theoriis erui posse, quæ primus euidem dilucidasse, non vero produxisse videbar. Hactenus de calculis; nunc autem, opusculo meo ab omni accusatione, labeque purgato, ad experimenta transitum faciamus.



ARTICULUS III.

Experimentorum expositio, quorum exitu antecedens Theoria confirmatur.

1. Machinamentum $A B C D$ ex cupro conflatum per cochleas K confiximus horizontali trabi (*Præfa. Parag. 9.*) in turris summitate. In verticali plano $A B C D$ fulcra prominebant quatuor, quorum duobus horizontalibus O, O , commissus erat vectes $E F I$, ita ut libere rotans strictim attingeret vectem $H L M$ horizontalibus aliis fulcris P, P , substantatum. Prominebat etiam fulcrum N in horizontalem cylindrum satis exilem desinens, cui occurrebat vectes $H L M$ in æqualem cylindrum terminatus. Prominebant denique uncus S soleulo instructus, cuius usum mox animadvertemus; & elastrum $Q R$, cuius vi cylindrus vectis $H L M$ urgebatur contra cylindrum fulcri N .

2. Vectes $E F I$ deorsum pressus in E vectem $H L M$ removebat ab N : tunc globi G filo (*Præf. Parag. 10*) uncus S circumdabatur ad eandem semper partem, &, filo in sulculo percurrente, globus quantum fieri poterat

Fig.VII.

rat elevabatur. Vecte tum postea *EFI* iterum remisso, elastrum *QR* in vectem *HL* *M* tanta vi obnitezatur, ut filum cylindris *M*, *N*, perstrictum ferre valeret globum plumbeum, cuius diameter par erat pedis pollici. Filum itaque supra *MN* scindebatur, quo facto, globus tantulum descendebat, ut libere quaquaversus vibrationibus posset indulgere. Lychno deinde altera globi facies illustrata per microscopium inspiciebatur (*Præf. Parag. 14*), & vibrationibus postremo penitus ablatis, depresso denuo in *E* vecte *EFI* globus illico cadebat. Machinamentum hoc ea ingeniosissimi Artificis nostri Francisci Comelli industria, & diligentia elaboratum, perfectumque fuit, quam tanta utique periculorum nostrorum difficultas postulabat.

3. Perpendiculum, quod in globum plumbeum desinebat, de constantis suspensionis globi *G* punto ad turris fundum deduximus, annexumque globum plumbeum vasculo aqua pleno immersimus; atque ut primum concitata atmosphæra sese composuit, exploravimus quam cerei plani (*Præf. Parag. 12*) partem perpendiculum pene quietum respiceret, eandem enim a cadentibus globis præter propter percutiendam fore arbitrabamur: Ceræ porro planum certo, fixo-

fixoque rectangulari limite circumdataum fuit, & præfinitum, cuius latera *TZ*, *TV*, meridianis observationibus sic fuerunt determinata, ut *TZ* terrestrem parallelum, *TV* vero meridianum circulum præferrent, occidentalem hunc, illum borealem pro variis punctis *X*, ad quæ cadentes globi sese directuros fore confidebam; neque enim novo hoc excogitato, advocatoque machinamento, atque tot habitis, tantisque cautionibus, diligentiam meam, spemque sic ultra frustrandam esse pertimescebam, ut fossarum excentricitatem multani forem offensurus. Foveæ itaque uniuscuiusque centrum *X* normaliter ad *TZ* atque *TV*, relatum fuit, ut indicavimus (*Præf. Parag. 20*), adiuvante Aloysio Tagliavini iuvene in mathematicis præsertim disciplinis expectationis vel maximæ, quem nobis accersivimus, ut defuncti Amici (*Præf. Parag. 23.*) munus obiret. Hic porro periculorum nostrorum ordo fuit, & exitus, non omissionis cœli vicissitudinibus, quæ tentamen unumquodque sunt comitatæ (*Præf. Parag. 6*).

Anno 1791.	Dejectorum globorum numerus ; atque Atmosphæræ status tempore lapsus .	Distantia centri cuiusque fossæ a meridiano TV, per pollices	Distantia eiusdem centri a parallelo TZ, antecedenti mensura putata .
Experimentum I.	I. quietus . Aere tranquillo . II. pene quietus . Flante vento .	Pol. 6: 11,25	Pol. 3: 6,83
Tertio nonas Junii . Ab hora noctis prima in tertiam usque .	II. quietus . Aere leviter flante .	Pol. 7: 6,50	Pol. 3: 10,67
Exper. II.	I. quietus . Cælo tranquillo . II. quietus . Aere leviter flante .	Pol. 7: 3,00	Pol. 3: 10,67
Exper. III.	I. quietus . Aere tranquillo . II. quietus . Aere tranquillo .	Pol. 7: 2,00	Pol. 4: 0,33
Exper. IV.	I. quietus . Aere pene tranquillo . II. quietus . Cælo tranquillo .	Pol. 7: 0,00	Pol. 3: 11,50
Exper. V.	I. quietus . Aere tranquillo . II. quietus . Aere pene tranquillo .	Pol. 7: 2,00	Pol. 3: 11,50
		Pol. 7: 1,25	Pol. 4: 0,00

Exper. VI.	I. quietus . Postridie idus eiusdem . Ab hora noctis prima in quartam .	Pol. 6: 11,25	Pol. 3: 10,67
	II. pene quietus . Vento validè flante .	Pol. 8: 5,00	Pol. 4: 4,17
Exper. VII.	I. quietus . Tertio nonas Septembbris . Ab hora noctis prima in quintam .	Pol. 7: 2,00	Pol. 4: 0,00
	II. quietus . Aere tranquillo .	Pol. 7: 1,25	Pol. 4: 0,00
	III. quietus . Aere tranquillo .	Pol. 7: 0,00	Pol. 3: 11,17
	IV. quietus . Aere pene tranquillo .	Pol. 6: 11,25	Pol. 4: 1,00

Distantiarum a meridiano TV
summa - - - - - Pol. 115: 2,00
quæ per globorum numerum
sexdecim divisa dat distan-
tiam centrorum fossarum me-
diam - - - - - Pol. 7: 2,375

Distantiarum a parallelo TZ summa - - - - - Pol. 63: 5,68
quæ per globorum numerum divisa dat me-
diam distantiam - - - - - Pol. 3: 11,605

4. Cum igitur , quod nemini experimenta huiusmodi capienti adhuc obtigerat , globos sexdecim periculo datos fossas eruisse observaverimus ferme concentricas (excepto sexti experimenti globo altero , de quo tamen miraberis nihil) ; finem experimentorum facere decrevimus ; præsertim cum , autumno accidente , futurum fore intelligeremus , ut ab opere prosequendo deterreretur . Ut vero labori nostro extremam manum imponeremus , perpendiculum deduximus , globorum aberrationem tandem perscrutaturi (*Præf. Parag. 12.*)

5. Constatbat perpendiculum ex æreo filo maxime flexili , quo uncus S fuerat obvolutus (*Parag. 2*), quodque extremitate altera marmoreum globum ferebat , cuius diameter exæquabat pollices $2 \frac{1}{3}$. Horizontali ætere plano (*Præf. Parag. 12*) cubus incumbebat ex ligno constructus , & intro plenus aqua , in quam moreus perpendiculi globus immersus , æreo filo suspensus detinebatur . Fila duo serica superiores quadratae superficie cubi diagonales referentia , ad quatuor in eius centro angulos sese intersecabant , in quorum unoquoque vertice si perpendiculum quiescens conseruaretur , suam in gravitatis centrum directionem satis faceret mani-

nifestam : perpendiculi videlicet positum investigabamus ea ipsa methodo , qua utuntur Astronomi in meridianis construendis . (*Eustacius Manfredi . De Gnomone Divi Petronii*) .

6. Tanta autem in hoc opere aeris tranquillitas desiderabatur (*Præf. Parag. 6*) , ut reliquo anni tempore perpendiculi quietem frusta expectaverimus ; quamquam nocturnis quandoque horis , quando civitas otocabatur tota , aer ipse omnino ferme sileret . Observationes itaque in sequentem annum produximus , atque omnem præter spem meam , idibus Februarii , aere ab hora noctis secunda in quintam usque perfecte tranquillo , perpendiculum tandem aliquando conquivit . Prædictis itaque filis extensis , cubique positione ad opus accommodata , perpendiculum denique in singulis cuiusque anguli verticibus per horæ dimidium quiescentem observare licuit ; intelleximusque ipsius directionem fuisse plane determinatam . Crastina tamen die periculum renovandum esse constituimus ; quod et si interdiu frusta tentatum sit , nocte tamen facta , iisdem horis , eodemque hesternæ diei successu iteratum est , ventis id nobis benevole concedentibus ; lucernulæ enim flammarum ad aperta singulorum turris parietum ostiola etiam altissima (*Præf. Parag. 6*) appositam nullo agitatio-

tionis motu iactari , rectamque assurgere obser-
vavimus . Infima itaque cubi superficie in ceræ
plano præfixa , cubum removimus , atque inscul-
ptæ quadratæ superficie centrum diagonalibus
iuvantibus lineis detectum ad lineas TV , TZ ,
retulimus , invenimusque a meridiano TV dista-
re *Pollibus* $6:6$, o, & a parallelo TZ *Pol.*
 $3:6$, 333.

7. Distantia itaque perpendiculi modo re-
perta *Pol.* $6:6$, o, a distantia media *Pol.* $7:2$,
375 (*Parag.* 3) dempta residuam dat orienta-
lem delapsorum globorum aberrationem medium
æqualem lineis 8, 375 . Distantia vero perpen-
diculi *Pol.* $3:6$, 333 deducta a media distantia
globorum *Pol.* $3:11$, 605 (*Parag.* 3) residuam
offert meridionalem aberrationem medium *lin.* 5,
272 .

8. Visuri ergo an calculi & experimenta
pari passu procederent , periculum instituimus
de tempore globorum lapsus per atmosphæram.
Id per Aloysium Tagliavini faciendum curave-
ram transacto anno dum ruri degerem ; ipse
autem ego repetii eadem methodo , & exitu
eodem . Pendulum in turris vertice collocavimus ,
quod in scrupula secunda tempus dividebat : ma-
num autem exercitatione multa sic assueveram ,
ut quatuor , quinque , & sex ictibus , secundum
quod-

quodque temporis scrupulum in quatuor , quin-
que , & sex æquales partes distribueret . Quo i-
taque momento alterum temporis scrupulum a
pendulo pulsabatur , eodem ego una manu glo-
bos dabam lapsui , altera lapsus tempus perscru-
tabar ; in ima etenim turre machinamentum con-
struxeram huiusmodi , ut quo momento delapsus
globus fundum attingeret , eodem ipso lucernu-
la extingueretur de sublimi turre conspicienda.
Experimentis igitur sæpen numero repetitis com-
peruimus tempus lapsus fuisse quam proxime
 $4'' \frac{1}{5}$; quod iusto maius est si illud ex tentami-
nibus colligas hac de caussa , & de eadem tur-
re alias captis (*Riccioli . Almagest. Lib. IX. Sect.*
IV. Capit. XVI.) ; est vero iusto minus si pe-
ricula couulas clarissimi viri Desaguliers (*Curs*
de Physi. Exper. Vol. I. Pag. 368) : quamob-
rem (*Artic. II. Parag. 29*) accipiam $K = 4''$,
ut fert altitudo $m M = \text{pedib. } 241$ (*Præf. Pa-*
rag. 6) , & $K + t = 4'' \frac{1}{5}$; in formula porro
 $\frac{a \cdot u}{r} t$ (*Art. I. Parag. 3*) sufficiam $K + t$ lo-
co t , ut orientalis aberratio sit $\frac{a \cdot u}{r} (K + t)$.

Corollarium I.

9. Est $u(K+t) = \frac{15'' \cdot 2''' \cdot 28'''}{4\frac{1}{3}} \times \frac{x}{\beta}$
 $(Art. II. Parag. 10) = 63''.10''.21'''$, qui arcus
ad parallelum turris nostræ est, cuius latitudo
habetur $\Psi = 44^\circ . 30'$; cum itaque sit $\cos. \Psi$
 $= 0,71325$, si dixeris $1 : \cos. \Psi :: 63''.10''.21''' :$
 $63''.10''.21''' \times \cos. \Psi = 45''.3''' . 28'''$, erit
 $u(K+t) = 45''.3''' . 28''' = 162 208'''$ in cir-
circulo telluris maximo. Est insuper $a = pedibus$
 241 , & radius medius $r = ped. 19613790$; unde
 $\frac{a}{r} = \frac{1}{81385}$; atque idcirco $\frac{a \cdot u}{r}(K+t)$
 $= \frac{162208'''}{81385}$. Est denique in telluris circulo ma-
ximo $5''' = pol. 1, 516$; ergo $\frac{a \cdot u}{r}(K+t)$
 $= pol. \frac{1285336}{2034525} = lineis 7, 581$, quæ orienta-
lis calculorum aberratio orientali aberratione
media *lin. 8, 375* experimentis obtenta (*Pa-*
rag. 7) minor est *lin. 0, 794*. Quod si in ab-
erratione media experimentorum putanda, sex-
ti tentaminis globum secundum reiicias, ratio-
ne iterum expuncta, orientalem periculorum ab-
errationem medianam invenies *lin. 7, 400*, quæ
a calculorum aberratione differt *lin. 0, 181*; ut
cal-

calculis propterea experimenta, quantum deside-
rari poterat; respondeant.

Corollarium II.

10. In formula $M r = \frac{a \times \sin. \Psi}{\sqrt{\beta^2 - 2\beta x \cos. \Psi + x^2}}$
 $(Art. II. Parag. 22) = \frac{a \times \sin. \Psi}{\beta - x \cos. \Psi}$, positis
 $\beta = 1$, & $x = a \cos. \Psi$ (*Art. II. Parag. 7*)
 $= \frac{\cos. \Psi}{288, 631}$ (*Art. II. Parag. 13*), habebitur
 $M r = M q = \frac{a \sin. \Psi \cos. \Psi}{288, 631 - \cos. \Psi}$. Est porro
 $a = pedib. 241$, $\cos. \Psi = \cos. 44^\circ . 30' = 0,$
 71325 , & $\sin. \Psi = 0, 70091$; ergo $M q =$
 $pollic. 5 : 0, 215$. Si modo feceris (*Art. II. Pa-*
rag. 29) $K^2 : (K+t)^2 :: pol. 5 : 0, 215 :$
 $(K+t)^2 pol. 5 : 0, 215 = \frac{(4\frac{1}{3})}{4^2} pollic. 5 : 0, 215$
 $= pol. 5 : 6, 378$, hæc erit meridionalis aberra-
tio corporum labentium per atmosphærā, a
qua si demas aberrationem *pol. 5 : 0, 215* in spa-
tio vacuo obtainendam, eui æqualem fieri dixi-
mus aberrationem perpendiculari (*Art. II. Parag.*
26), residuam habebis (*Art. II. Parag. 30.*)

meridionalem delapsorum corporum aberrationem a perpendiculo æqualem *lin.* 6, 163, quæ a media aberratione experimentis manifestata *lin.* 5, 272 (*Parag.* 7) differt *lin.* 0, 891; quare hac etiam ex parte calculi & experimenta mirifice convenient; iis præsentim attentis, quæ diximus (*Art. II. Parag.* 31, 49).

Corollarium III.

11. Orientem inter atque meridiem observabitur corporum aberratio a perpendiculo maxima: erit autem hæc ex calculis æqualis *lin.* 9, 930, ex tentaminibus vero (*Parag.* 7) *lin.* 9, 896; quarum quantitatum discriminem *lin.* 0, 034 consideratione nulla dignum est.

12. Globos interim plumbeos lœvi, & tenuissima picea superficie illitos, obductosque, qua mercurius plumbō consociari vetaretur, mercurio immersimus eo consilio, ut si massarum centrum caderet extra centrum figuræ, infimum sibi intra mercurium locum vindicaret. Eminens tum postea quiescentium globorum punctum notabamus, per quod iis filum inserebatur (*Præf. Parag.* 10), eosque iterum mercurio probabamus visuri an eodem atque antea modo innarent. Sic de industria provisum fuisse expectabam-

ba-

bamus, ut globi in labendo nullo rotationis motu detorquerentur.

13. Hoc porro tentamen experiri aeris vicissitudines adhuc prohibuere; & quoniam dilata huiusc opusculi editio maiorem sui spem in dies movere videbatur; diutius idcirco publicationi supersedere noxium duxi: quamquam enim quæ in lucem nunc do experimenta a celesterrimis viris frustra dum tentata fuerint; non ea tamen sunt, quæ laudem aliam præter diligentia, patientiaque mereantur ullam. Manent vero in turre omnia ad experimentum necessaria, atque occasione oblata, nec non ut amicis modum geramus, paratos globos periculo libenter dabimus.

Scholion.

14. Ex Solis attractione in tellurem sphæroideam illud fit, ut rotantis telluris polus figuræ in curvam lineam quotidie feratur circa actualis rotationis polum perpetuo variabilem, ita tamen ut, elapso die, polus figuræ fiat iterum polus rotationis. Curvam hanc primus æquationi subieci, atque (*Sermonे habito in Academia Instituti Scientiarum An. 1787.*) cycloidalēm esse demonstravi; sic ut circuli generatoris punctum

ctum cycloidem describens sit polus figuræ , interim dum rotationis polus fertur super basi , estque semper in contactu cum circulo generatore : quamobrem maxima poli figuræ a rotationis polo aberratio æqualis est cycloidis axi . Demonstravi etiam æquinoctiorum præcessionem ex solis attractione tantam esse , quanta haberetur si dimidia anni parte sol in solstitionum coluro degeneret ad maximam , quam hic loci habet , declinationem ; ut ex aliorum quoque hac de re Scriptorum formulis nullo negotio eruitur . Cum porro hæc omnia , discrimine vel minimo , etiam de Luna valeant , cumque æquinoctiorum præcessio polaris prædicti motus effectus sit , qui per observationes innotuit ; prædictæ quoque cycloidis axis , quando maximus expectandus sit , facilime detegitur , atque determinatur ; quare , calculis subductis , inveni maximam poli figuræ a rotationis polo aberrationem æqualem *pollicibus* 20 circiter . Suspiciatur itaque variationem hanc fuisse caussam periodiei excursus longissimi perpendiculari , de quo se observationes sumpsisse factetur Alexander Calignoni (*Gassendi Tom. IV. Fol. 520*) , illam calculis dedi , veritus ne in perpendiculari aberrationes supra putatas discrimen invehheret ; verum discrimen hoc ne ob oculos quidem microscopio instructos cadere posset ;

quam-

quamobrem si Alexandri Calignoni observationibus fides adhibenda sit , ipsum in fallaces experimentorum circumstantias incidiisse dicam , e quibus se labore vix multo expedivit Ximenes (*del Vecchio , e Nuovo Gnomone Fiorentino Lib. I. Cap. VII.*) , queis vero nocturnis ego observationibus obviavi .

15. Non alienum denique a re nostra erit , si hic ultimo nonnulla addamus de experimentis tormentum bellicum ad id opus ineundis : fuerunt enim qui ad hoc periculorum genus fidem adiunxerint , tum præstantissimi Newton authoritate male interpretata præoccupati (*Birch Tom. III. Pag. 512*) , (*de la Lande Astron. Tom. I. Liv. V.*) , tum clarissimi d' Alembert calculis commoti (*Hist. de l' Acad. Roy. An. 1771.*) ; quos , ne in longum nimis abeamus , hortabimur ut ea legant , quæ de istiusmodi experimentorum per celeberrimum Mersenne , comitante sibi illustri viro Petit , institutorum exitu scripta nobis reliquerunt summi viri Descartes (*Epistol. Commer. Tom. I. Epist. 73* , *Tom. II. Epist. 106*) , & Varignon (*Conjectures sur la Pesanteur*) ; globos enim per Mersenne verticaliter explosos , iterum sane delapsos , valde vero deviatos , reperire non licuit ; ita ut eos Mersenne , Descartes , & Varignon , non relapsos esse , sed per im-

immensa cælorum spatia adhuc exulare , conie-
ctarint .

16. Sed de diurno motu iam satis : de an-
nuo porro quid sentiendum sit , videat quis-
que in astronomicis disciplinis vel leviter ver-
satus .

F I N I S.

Pag.	lin.	Errata	Corrige
9	27 occurrerepro	occurrere prohi-	
14	14 levior	lævior	
17	13 filium	filum	
21	18 prætium	pretium	
37	18 $m E < m M$	$m E > m M$	
39	2 5623 , o 14	5623 , 0214	
47	6 $\gamma^2 \cos. \Psi^2$	$\gamma^2 \cos. \Psi^2$	
55	10 perpendiculum	perpendiculum	
80	19 mormoreus	marmoreus	

V I D I T

D. Ignatius Augustinus Scandellari Cleric. Regul.
S. Pauli, & in Eccl. Metrop. Bonon. Poenit. pro
Emo ac Rmo Domino D. Andrea Cardinali Joan-
netto, Ord. S. Benedicti, Congregat. Camaldul.
Archiep. Bonon. & S. R. I. Principe.

Die 18. Aprilis 1792.

I M P R I M A T U R.

Fr. Aloysius Maria Ceruti Vic. Gen. S. Officii
Bonon.

UNIVERSITÀ CATTOLICA S. CUORE

nu
deco
cambo
data

88149

